

甘肅全省新通志

卷八
拾五

甘肅新通志卷之九十七

軼事

志者紀事之名通志紀通省之事則亦通省之史也第史有褒貶志則直書其事而已事關政要既備書矣而其軼時散見於他說可以備見聞資考據采輯備登庶乎拾遺補闕亦甘疆一雜俎云

羅泌路史載地皇氏逸于有人皇九男相像其身九章羅莘注云見雜書胡

洮龍軀注云姓愷名胡洮人面龍章九頭驤身達腋出刑馬山提地之國注引遁甲開山

圖云人皇出于刑馬山提地之國山在今秦州伯陽谷水出之老子所至相厥山川形成勢集才同為

九州謂之九圍別居一方因是區理是以後世謂居方氏雜書云人皇兄

弟別長九州已居中州以制八輔九州始肇分矣駕六提羽乘雲祗車制其八士為人立

命爰役風雨以御六氣迺出谷口還乘清冥覆露六幕罔不承命離良是仇有佐無位主不虛王臣不虛貴政教君臣所自起也飲

甘肅新通志

卷九十七

志餘 軼事

一

食男女所自始也按今人物志聖賢門止列伏羲女媧不及人皇者事屬皇古徵信為難載入軼事亦仍不敢臆

斷云爾又按鄭樵通志以伏羲為天皇神農為人皇黃帝為地皇果爾則路史所載地皇氏逸于有人皇又何以稱焉

秦州新志謂舊志及清水縣志皆載有黃帝今考黃帝生于壽邱自

皇甫謐以來無異說壽邱在魯東門之北史記注文亦明羅莘路

史注雖有壽邱在上邽語孤說似難據也惟清水有軒轅谷土人

以為黃帝所生相傳已久今亦不敢徑斷為非姑附誌其說以待

達者正焉按水經注黃帝生于上邽軒轅谷則路史注壽邱在上邽者似可據也

莊子言黃帝問道崆峒遂見大隗迷于襄城之野適遇牧馬童子問

途焉請問為天下小童曰夫為天下者亦奚以異乎牧馬者哉亦

去其害馬者而已矣黃帝再拜稽首按大隗無注不知何指考春秋赤狄隗姓其女叔隗季隗

見左傳至西漢未有隗囂天水成紀人其時天水郡治平襄即今通渭縣境則黃帝時之大隗必係著姓襄城當即平襄之地非後

世許州之襄城縣也崆峒辨在平涼見後考異

史記黃帝西至崆峒登雞頭括地志以崆峒在肅州雞頭在原州又

雞頭自是兩山然相去必不遠肅州崆峒附近無雞頭山則以黃

帝所至為即肅州崆峒者殊無據也成縣志又以登雞頭為登成

雞頭按之地理當以在平涼者為是况問道廣成子皆登崆峒事

今平涼崆峒山有黃帝問道宮必無因而出

此也平涼崆峒山有黃帝問道宮必無因而出

黃帝葬橋山通鑑輯覽注山在陝西鄜州之中部縣西北亦日子

帝堯命和仲宅西西極之地地理今西和縣地謂縣因和仲得名也

大禹生于石紐長于西羌封夏伯故曰伯禹天下宗之故曰大禹

地理志陝右慶陽府有狼乳溝乃稷棄于野狼乳之地後人遂以名

溝按詩言牛羊腓字之狼乳之說以鬪穀於菟事推之殆非臆造

后稷之後不窋值夏道衰失官竄于戎狄之間程大昌曰慶陽府是也

再世至公劉乃徙于豳

西伯昌伐密須今甘肅涇州靈臺縣有初西伯問太公孰可伐太公

甘肅新通志 卷九十七 志餘 軼事 一一

日密須管叔曰其君彊明伐之不可太公曰先王伐逆不伐順伐

險不伐易遂自阮國名在涇州徂共阮之邑今涇而及密須密須人自

縛其君而來歸

韓詩外傳太公使南宮适至義渠得駭雞犀以獻紂

穆王得八駿馬有造父者以善御幸遂西巡狩樂而忘歸聞徐子僭

號恐遂稱受命乃命造父御一日千里長馳而歸

穆天子傳天子觴西王母於瑤池之上西王母為天子謠曰白雲在

天山隙古陵自出道里悠遠山川閒之將子無死尚能復來天子

答之曰予歸東土和治諸夏萬民平均吾顧見汝比及三年將復

而野天子遂馳升於弇山乃紀丌跡於弇山之石而樹之槐眉曰

西王母之山

共王遊於涇上密公從有三女奔之其母曰必致之王夫女三為粲

美物也而何德以堪之密公不獻一年王滅密

春秋紀侯為齊所滅後因以國為氏隋有司農少卿和整世居天水

上邽又楚莊王少子為上官大夫以上官為氏秦滅楚遷之上邽

周貞定王八年秦與韓魏翦滅諸戎中國無寇患惟餘義渠種至二

十五年秦伐義渠虜其王後八年秦伐義渠取郁郅後又取徒涇

二十五城至赧王四十三年宣太后誘殺義渠王於甘泉宮因起

兵滅之置隴西北地上郡

秦滅趙及代王嘉使嘉子公輔主西戎西戎懷之號曰趙王世居隴

西天水西縣又春秋權國為楚所滅秦遷之隴西世為成紀著姓

秦始皇巡隴西北地至雞頭山過回中秦隴西郡今甘肅臨洮鞏昌諸府地北地郡今甘肅平涼

慶陽諸府地雞頭山亦曰笄頭山在今平涼府平涼縣西回中宮舊說在鳳翔府隴州西北今按涇州有回中山回中宮即在其地

漢興六郡良家子選給羽林期門以材力為官名將多出焉師古曰

甘肅新通志

卷九十七

志餘 軼事

三

隴西天水安定北地上郡西河是也

漢武帝行幸雍遂北出蕭關歷獨鹿鳴澤自代而還

任立政字少公隴西人李陵故人也昭帝初大將軍霍光左將軍上

官桀遣立政等三人俱至匈奴招陵

王莽末天水童謠曰出吳門望緹羣見一蹇人言欲上天今天可上

地上安得民時隗囂初起兵後意稍廣遂亡滅郭門名緹羣山名

更始三年春正月平陵人方望以前孺子嬰稱帝于臨涇漢縣故城在今甘肅

涇州鎮原縣先是方望度更始必敗更始徵隗囂囂將行望止之不聽

遂辭囂而去與安陵人弓林等求得前定安公嬰于長安將至臨

涇立之聚眾數千人望為丞相林為大司馬更始遣李松擊破皆

斬之

漢光武帝即位命有司設壇場於鄗南千秋亭五城陌水經注曰亭

有石壇壇有圭頭碑其陰云常山相隴西狄道馮龍所造

公孫述字子陽茂陵人也哀帝時以父任爲郎後父仁爲河南都尉而述補清水長仁以述年少遣門下掾隨之官月餘掾辭歸白仁曰述非待教者也後太守以其能使兼攝五縣政事修理姦盜不發郡中謂有鬼神更始立述據有成都威震益部尋自稱天子號成家後爲漢兵所刺洞胸墮馬而死吳漢破其城夷述妻子盡滅

公孫氏

光武時馬淵爲隴西太守牛宗爲主簿羊嘉爲功曹郡人謂之三牲

司徒王允謀討董卓

隴西臨洮人

先時長安謠曰千里草何青青十日上

不得生及卓誅百姓歌舞於道賣衣裝市酒肉相慶卓素充肥暴屍於市守吏爲大炷置臍中然之光明達曙如是積日

晉王嘉子年拾遺記張掖郡有鄧族鄧奇字君珍居喪盡禮所居近

甘肅新通志

卷九十七

志餘 軼事

四

墓百里每夜行常有飛鳥銜火夾之登山濟水號泣不息未嘗以險難爲憂雖夜如晝之明也以淚灑石則成痕著朽木枯草必皆重茂以淚灑地卽鹹俗謂之鹹鄉至昭帝嘉其孝異表銘其地曰孝子鄉四時祭祀立廟焉

西羌之本出自三苗姜姓之別也俗無常居依隨水草少五穀以畜產爲業氏族無定以父名母姓爲種號十二世後相與婚姻不立君臣無相長一強則分種爲酋豪弱則爲人附落更相抄暴以力爲雄殺人償死無他禁令其兵常在山谷中短於平地不能持久而果於觸突以戰死爲吉利病終爲不祥耐寒苦同於禽獸雖婦人產子亦不避風雪性堅剛勇猛得西方金行之氣焉夏后氏曰畎夷殷曰西羌鬼方或曰鬼戎周曰犬戎今張掖南山黑番蓋其種落或秦無弋援劍之後而忍子九種舞子十一種之末流餘

裔也

晉時金城太守胡勗叛涼張軌遣都護宋毅治中令狐瀏討之濟河中流白魚入船瀏曰魚鱗物敵必解甲歸我矣勗請降軌宥之杜有道妻嚴氏字憲京兆人十八而嫠居生子植女鞞鞞亦有淑德傅元求爲繼室憲許之時元與何晏鄧颺不合晏等每欲害之時人莫肯共婚及憲許元內外憂懼憲曰晏等驕侈必當自敗遂與元爲婚元前妻子咸年六歲嘗隨其繼母省憲謂咸曰汝千里駒也以其妹之女妻之咸後亦有名於海內

前涼敦煌郭瑀隱薤谷張天錫使使者孟公明以禮徵之瑀指飛鴻示之曰此鳥也豈可籠哉乃逃去使者拘其門人瑀歎曰吾逃祿非逃罪也豈得隱居行義害及門人乃出就徵

趙整略陽清水人爲苻秦祕書侍郎秦王堅送其子長樂公丕至灊

甘肅新通志

卷九十七

志餘 軼事

五

上不所領氏三千戶別其父兄皆慟哭哀感路人整因侍宴援琴而歌曰阿得脂阿得脂伯勞舅父是仇綏尾長翼短不能飛遠徙種人留鮮卑一旦緩急當語誰堅笑而不納整宦官也博文彊記能屬文好直言而諫慕容垂夫人得幸於堅堅與之同輦遊於後庭整歌曰不見雀來入燕室但見浮雲蔽白日堅改容謝之命夫人下輦堅與羣臣飲以極醉爲限整作酒德之歌曰地列酒泉天垂酒旗杜康妙識儀狄先知紂喪殷邦桀傾夏國由是言之前危後則堅大悅自是宴羣臣禮飲而已整後出家事佛更名道整竇滔妻蘇氏始平人也名蕙字若蘭善屬文滔苻堅時爲秦州刺史被徙流沙蘇氏思之織錦爲迴文旋圖詩以贈滔宛轉循環以讀之詞甚悽惋凡八百四十字

辛進隴西人仕西秦乞伏熾磐至尙書初爲散騎常侍從熾磐遊於

後園凌霄觀進彈飛鳥誤中暮末之母傷其面及暮末卽位問傷母面之由其母以狀告暮末大怒卽日收進殺之並其五族二十七人

後涼呂光徙西海郡人於諸郡謠云朔馬心何悲念舊中必勞燕雀何徘徊意欲還故巢遂相煽動乃復徙之樂都

晉書在昔有如弗斯出連叱盧三部自漠北南出大陰山遇一巨蟲於路狀若神龜大如陵阜乃殺馬而祭之祝曰若善神也便開路惡神也遂塞不通俄而不見乃有一小兒在焉時又有乞伏部老父欣然自以有所依憑字之日紇于紇于者夏言依倚也年十歲驍勇善騎射彎弓五百斤四部服其雄武推爲統主號之曰乞伏可汗託鐸莫何託鐸者言非神非人之稱也其後有祐鄰者卽國仁五世祖襲樂都降僣檀之熾磐卽國仁從子也

甘肅新通志

卷九十七

志餘 軼事

六

後燕慕容德爲苻堅太守堅伐晉德從之留金刀別其母而去慕容垂起兵山東苻昌誅德家德母公孫氏及其兄納妻段氏爲故吏呼延平所護納遺腹子超生羌中十年公孫且死以金刀授超曰若後東歸可以還汝叔也洎超至廣固以金刀奉德德無子以超爲太子而平女呼延氏爲之妃及超卽僞位稱帝后云

視罷性英果有雄略嘗從容謂博士金城騫苞曰易云動靜有常剛柔斷矣今將秣馬屬兵爭衡中國先生以爲何如苞曰大王之言高世之略秦隴英豪所願聞也於是虛襟撫納眾赴如歸

南涼秃髮烏孤稱武威王徙於樂都以金石生時連珍四夷之豪雋陰訓郭倖西州之德望楊統楊貞衛殷麴丞明郭黃郭奮史嵩鹿嵩文武之秀傑梁昶韓正張昶郭韶中州之才令金樹辭翹趙振王忠趙晁蘇霸秦雍之世門皆內居顯位外宰郡縣官方授才咸

得其所

南涼禿髮利鹿嗣僞位徙居於西平使記室監麴梁明聘於段業業曰貴主先王創業啟運功高先世宜爲國之太祖有子何以不立梁明曰有子羌奴先王之命也業曰昔成王弱齡周召作宰漢昭八歲金霍夾輔雖嗣子幼冲而二叔休明左提右挈不亦可乎梁明曰宋宣能以國讓春秋美之孫伯符委事仲謀終開有吳之業且兄終弟及殷湯之制也亦聖人之格言高代之通式何必系已爲是紹兄爲非業曰美哉使乎之義也

北涼沮渠蒙遜率步騎三萬伐禿髮儁檀次於西郊大風從西北來氣有五色俄而晝昏至顯美徙數千戶而還

蒙遜西祀金山遣沮渠廣宗率騎一萬襲烏啼夷大捷而還蒙遜西至苕菴遣前將軍沮渠成都將騎五千襲卑和夷蒙遜率中軍三

甘肅新通志

卷九十七

志餘 軼事

七

萬繼之卑和夷率眾迎降遂循海而西至鹽池祀西王母於寺中有元石神圖命其中書侍郎張穆賦焉銘之於寺前遂如金山而歸

宋武帝時甯州嘗獻虎魄枕光色甚麗價盈百金時將北伐以虎魄療金瘡帝大悅命碎分賜諸將

梁青州石鹿山臨海先有神廟刺史王神念以百姓祈禱糜費毀神影壞屋舍當坐棟上有一大蛇長丈餘役夫打撲不禽得入海水有陰子春者字幼文武威姑臧人也是夜夢見人通名詣子春云有人見苦破壞宅舍既無所託欽君厚德欲憩此境子春心密記之經二日而知之甚驚以爲前此所夢神因辦牲醑禱告安置一處數日復夢一朱衣人相聞辭謝云得君厚恩當以一州相報子春心喜供事彌勤經月餘魏欲襲胸山閒諜前知子春設伏摧破

之詔授南青州刺史鎮胸山又遷都督梁青二州刺史
後魏姑臧段承根父暉字長祚身長八尺餘師事歐陽湯湯甚器愛
之有一童子與暉同學後二十年童子辭歸從暉請馬暉戲作木
馬與之童子甚悅謝暉曰吾太山府君子奉勅遊學今將欲歸煩
子厚贈無以報德後位至常伯封侯非報也且以爲好言終乘木
馬騰空而去

後魏趙默字文靜酒泉安彌人先世爲西夷校尉涼州平沒入爲閹
人有容貌恭謹小心賜爵關內侯累遷選部尚書能自謹勵當官
任舉頗得其人加侍郎進爵河內獻文將傳位京兆王子推訪諸
羣臣百官唯唯莫敢先言惟源賀等辭義正直不肯奉詔獻文怒
變色復以問默默對曰臣以死奉戴皇太子不知其他獻文默然
良久遂傳位於孝文孝文立默得幸兩宮祿賜優厚後出爲鎮南

甘肅新通志

卷九十七

志餘 軼事

八

大將軍儀同三司定州刺史進爵爲王默克已清儉憂濟公私時
有人欲行私賂默曰官高祿厚足以自給賣公營私本非情願終
無所納帝聞之賜帛五百疋穀一千石後薨於冀州刺史追贈司
空諡曰康子熾嗣

斛律金朔州勅勒部人詣雲州魏除爲第二領人酋長秋朝京師春
還部落號曰雁臣子光嘗從文襄校獵雲表見一大鳥射之形如
車輪旋轉而下乃鷗鳥也號射鷗手

南北朝梁覽字景獻金城人其先出自安定避難走西羌世爲部落
酋帥曾祖穆以枹罕城歸魏封臨洮公祖顥爲尚書封南安公父
釗河華二州刺史封新陽縣伯覽家世豪富貲累千金孝昌初秦
州莫折念生胡琛等反散財招募有二千人鎮河州從大軍平賊
歷梁河二州刺史封安德縣侯覽旣爲本州刺史盛修甲仗人馬

精銳吐谷渾憚不敢出皆曰梁公在未可行也永安中策授世爲河州刺史永熙中改封郡公大統二年加太尉其年覽從弟亾定反欲圖覽覽與數戰未能平王師至始破之四年遷太傅及河橋之役王師敗時病留長安趙青雀反北城覽爲之謀主事平乃見殺子鸛雀位儀同三司大都督

北史突厥傳其先居西海之右後爲鄰國所破盡滅其族有一兒棄草澤中有牝狼以肉餌之及長與狼合遂有孕焉其後阿史那最賢遂爲君長故牙門建狼頭纛示不忘本也

辛彥之狄道人崇信佛道於城內立浮圖二所並十五層開皇十一年州人張元暴死數日乃蘇云遊天上見新構一堂制極崇麗元問其故人云洛州刺史辛彥之有功德造此堂以待之彥之聞而不悅其年卒

甘肅新通志

卷九十七

志餘 軼事

九

隋煬帝初裴矩上西域圖記帝大悅曰引矩御座問西方事矩盛言胡中多諸寶物吐谷渾易并吞由是甘心通西域復令矩至張掖引致西番至者十餘國帝又大悅及帝幸張掖至燕支矩使西番二十七國佩金玉披錦罽焚香奏樂迎候道左帝尤大悅令張掖士女盛飾縱觀衣服車馬不鮮者州縣督課以誇示之

党項羌者三苗之後其種有宕昌白狼皆自稱獼猴種東接臨洮西拒葉護南北數千里處山谷間每姓別爲部落

唐高祖李淵字叔德隴西成紀人梁武昭王暠之七世孫體有三乳七歲襲封唐公後受隋禪有天下

騫味道蘭州金城人其先孔子弟子閔子騫之後高祖威魏鄯州刺史封隰成公父直唐華州刺史味道仕則天朝光宅元年爲左肅政臺御史大夫李敬業起兵太后問計於中書令裴炎炎對曰若

太后返政則不討自平矣監察御史崔訥奏炎有異志太后令味道與侍御史魚承曄參鞫之收炎付獄以味道檢校內史同鳳閣鸞臺三品垂拱元年司門員外郎房光敏坐累貶衡州司馬詣宰相自訴味道曰此太后處分太后聞之貶味道青州刺史謂侍臣曰君臣同體豈得歸惡於君引善自取乎四年復爲左肅政臺御史大夫同鳳閣鸞臺平章事味道素不禮於殿中侍御史周矩屢言其不能了事會有羅告味道者敕矩按之矩謂味道曰公嘗責矩不了事今日爲公了之味道及其子辭玉皆伏誅

狄仁傑爲甯州刺史御史郭翰巡隴右入甯州界耆老歌刺史德美者盈路

酉陽雜俎云開元中河西騎將宋青春每陣嘗運劍大呼執馘而旋未嘗中鋒鎬西戎憚之一軍賴焉後吐蕃入寇獲生口數千軍帥

甘肅新通志

卷九十七

志餘 軼事

十

令譯問衣大蟲皮者曰爾何不能害青春答曰常見青龍突陣而來兵刃所及若叩銅鐵我以爲神助將軍也青春乃知劍之有靈明皇獲二十七仙玉像於甯州羅川縣金華洞奇偉異狀各各不同內有心星一座甚美手版復有明制御名其地屬互可思莊其人已百歲復置眞甯觀改羅川爲眞甯縣今有玉像圖傳於世

明皇西幸經河池斜谷左拾遺高適佐哥舒翰守潼關翰敗適走間道及帝於河池因言翰忠義有素而病奪其明乃至荒踣監軍諸將不恤軍務以倡優蒲箏相娛樂渾隴武士飯糲日不厭而責死戰其敗固宜又魯炅何履光趙國珍屯南陽而一二中人監軍用事是能取勝哉臣數爲楊國忠言之不肯聽故陛下有今日行未足深恥帝頷之車駕至河池劍南節度使崔圓馳奏蜀土腴穀羨儲供易辦帝歎其忠卽日拜爲中書侍郎同平章事

李白隴西人常往還蜀隴閒經河池之青泥嶺作蜀道難詩以壯峻隴時房瑄杜甫在嚴武幕意爲房杜危之也

肅宗在靈武以衛御少卿募民綏銀閱旬眾數萬

肅宗卽位于靈武詔有直言極諫才能牧宰文詞博達武藝絕倫孝弟力田沈淪草澤委所在官長表薦詣闕自陳者亦聽

慶州有破丑氏族三野利氏族五把利氏族一與吐蕃姻援贊普悉王之因是擾邊凡十年子儀言党項陰結吐蕃爲變可遣使者招慰因令將作少監梁進用爲慶州刺史

譚元澄爲嵐州刺史有恩於李晟後貶岳州比晟貴上疏理之詔贈元澄爲甯州刺史撫其二子皆爲成就官學人皆義之

楊朝晟爲邠甯節度使請城方渠合道木波以遏土番師次方渠水乏有青蛇降嶮下走視其跡水從而流朝晟使築防環之遂爲停

甘肅新通志

卷九十七

志餘 軼事

十一

淵士飲仰足已城土番悉眾至度不能害乃引去

郭昉領邠甯而議者頗有臧否柳公權因上召問得失言之帝曰昉官無玷缺自大金吾位方鎮何所更議答曰昉誠勳舊然人謂獻二女乃有是除信乎帝曰女是參陳太后豈獻哉公權曰嫌疑間不可戶曉因引王珪諫廬江王事帝卽命中官自南門遣女還郭收家

唐德宗時党項諸部相率內附居慶州者號山東部落居夏州者號平夏部落有大姓而無君長不相統一散處邠甯鄜延靈武河西東至麟府之間其在靈慶閒者數犯邊爲盜後唐明宗遣康福等討之由是其患稍息

回鶻其先匈奴部人多乘高車元魏時號高車部或曰勅勒訛爲鐵勒其部落十五種皆散處磧北韋紇其一也至隋曰韋紇稍彊始

置君長尋改回紇唐貞觀中始通於中朝武后時避突厥始度磧徙甘涼閒天寶中悉有九姓地久之廣袤與古匈奴並助肅宗討祿山其極盛也德宗朝改號回鶻開成中始衰大中中其遺種龐特勒據甘州特勒回鶻子姓稱非官號也

鐵勒九姓曰藥羅葛曰胡咄葛曰咄羅勿曰貊歌息訖曰阿勿滴曰葛薩曰斛嗚素曰藥勿葛曰奚邪勿陳子昂所云山北九姓者也摩尼回鶻所奉師也其法曰晏食飲水茹葷屏湮酪可汗常與共國而摩尼至唐歲往來西市商賈頗與囊橐爲奸按摩尼今回回掌教也日晏食把齊也其入中國元和元年也

回鶻俗可汗常樓居妻號天公主國相號媚祿都督見可汗去帽披髮而入以爲禮婦人總髮爲髻高五六寸以紅帽囊之旣嫁則加氈帽

甘肅新通志

卷九十七

志餘 軼事

十一

唐文宗時遣使至西域甘州爲回鶻牙而甘涼陷虜者夾道迎呼涕泣曰皇帝猶念陷番人民否其人皆天寶中陷番者子孫語言稍變而衣服猶不改也

後唐明宗時權知西涼府留後孫超遣大將拓跋承誨來貢明宗召見承誨云涼州西北至甘州五百里舊有鄆人二千五百爲戍卒及黃巢之亂遂爲阻絕今城中漢戶百餘皆戍卒子孫衣服言語略如漢人郭外數十里尚有漢民陷沒者耕作詔授超河西軍節度使留後超卒有折逋嘉繼之甘州亦伊等所轄也

後晉高祖天福三年回鶻可汗王仁裕使翟全福入貢京師次年封仁裕爲奉化可汗仁裕仁美弟也先册爲順化可汗後改奉化高居誨紀行云回紇牙南山百餘里漢小月支故地有別號獨角山沙陀卽朱邪氏之遺自甘州西始涉沙磧無水必載筒以行甘州

人教使者作馬蹏木澀馬蹏鑿四竅木澀亦四竅而綴之駝蹏則包以鞞皮乃可行想卽册封時所紀

亂石神者宋乾德間隴干人嚴氏伯仲也爲南北湫神禱雨立應今華亭稱蓋國大王靜甯隆德稱惠澤大王

太平興國中靈州貢馬足有二距其後靈州陷于西戎北邊禍作夏元昊數諫其父勿臣宋德明輒戒之曰吾用兵久疲矣吾族三十年衣錦綺此宋恩也不可負元昊日衣皮毛事畜牧蕃性所便英雄之生當霸王耳何錦綺爲明道元年冬十一月德明卒元昊嗣宋遣楊吉授元昊三使封西平王契丹亦遣使册元昊爲夏國王唃廝囉集兵殺逋哥徙居青唐宋景祐中以廝囉爲保順節度觀察留後歲以奉錢令秦州就賜元昊侵掠其界兵臨河湟廝囉知眾寡不敵壁鄯州不出陰閒元昊頗得其虛實元昊已渡河插幟志

甘肅新通志

卷九十七

志餘 軼事

十三

其淺廝囉潛使人移植深處以誤元昊及大戰元昊潰而歸士視幟渡溺死十八九所鹵獲甚眾自是數以奇計破之元昊遂不敢窺其境

元昊將反華州有二生日張曰吳者久困場屋薄遊塞上聞元昊有意窺中國遂叛而往卽其都門之酒家劇飲終日引筆書壁曰張元昊吳來飲此邏者執之元昊責以入國問諱之義二人大言曰姓尚不理會乃理會名耶時元昊用中國賜姓故二人云然元昊竦然異之由是日尊寵用事凡夏人立國規模入寇謀畫皆二人所導也

范仲淹知慶州兼經略招討使未幾賊兵叩城仲淹揮兵血戰賊遂奔北久之种世衡不利於定州人心搖動及見仲淹耀兵號令嚴明相賀曰邊上自有龍圖公爲長城吾屬何憂

韓琦范仲淹經略西夏在兵閒久名重一時人心歸之朝廷倚以爲重二人號令嚴明愛撫士卒諸羌來者推誠撫接咸感恩畏威不敢輒犯邊境邊人爲之謠曰軍中有一韓西賊聞之心膽寒軍中有一范西賊聞之驚破膽

种世衡知環州羌酋慕思部落最强世衡嘗夜與飲出侍姬佐酒旣而世衡起入內潛於壁隙窺之慕思竊與侍姬戲世衡出掩之慕思慚謝世衡笑曰君欲之耶卽以遺之由是得其死力

元昊大將野利綱哩拉雅奇弟兄皆有才謀號大王親信用事种世衡謀閒之乃爲蠟書遣王嵩遺綱哩拉言朝廷知王有向漢心已授夏州節度并以棗綴畫龜喻其早歸之意綱哩拉得書笑曰种使君長矣何爲此兒戲乃執嵩以書自詣元昊上之元昊果疑綱哩拉不令歸而錮嵩弇中遣人詐爲綱哩拉使使世衡世衡知其

甘肅新通志

卷九十七

志餘 軼事

十四

爲元昊所遣故爲款語而厚遣之使還元昊出嵩弇中而綱哩拉已報死矣世衡知其謀已行復爲文以祭綱哩拉悼其兄弟有意本朝垂成而失投之境上夏人得之以獻元昊雅奇以此亦并獲罪元昊旣失二將久之知爲世衡所賣遂定講和之策

范純仁知慶州餓莩滿路官無穀以賑恤純仁欲發常平封椿粟麥濟之僚屬請奏而須報純仁曰人七日不食卽死何可待報諸君且勿憂吾甯獨坐罪

熙甯中時議取河湟自古渭砦按青唐武勝軍應招納蕃部市易募人營田等事并令王韶主之韶至秦會諸將以蕃部俞龍珂在青唐最大渭源羌與夏人皆欲羈縻之議先致討韶因按邊引數騎直抵其帳諭以成敗遂留宿明日兩種皆遣其豪隨韶以東龍珂率其屬十二萬口內附自言平生聞包中丞朝廷忠臣乞賜姓包

氏帝如其請賜名順

狄道有白馬將軍廟義無所稽或以宋顧琛守吳郡曾立白馬廟其神卽此似矣但於狄道無涉考金史熙宗天眷元年熙河野水見一人乘白馬紅袍玉帶如少年官狀馬前有六蟾蜍凡三時乃沒土人神之而遂爲立廟

吳涪國武安王玠德順軍人與鎮戎軍人曲端起兵涇原招流民潰卒捍賊所過人供糧秸道不拾遺猛士如林甲軍蔽野每戰必先占高原必勝之地未嘗敗衄賊稍北退守河東不敢逾河飲馬

吳信國武順王璘武安王玠弟也金廢劉豫歸宋河南地幕府擬表稱賀璘讀之愀然曰在朝廷休兵息民誠天下慶璘等叨竊不能宣國威靈亦可愧矣何賀之有但當待罪稱謝則可幕府謝不及劉武穆公錡秦州成紀人自金人渡淮淮南之人惟視錡兵以爲安

甘肅新通志

卷九十七

志餘 軼事

十五

危錡旣得東關之險稍休士卒兵力復振虜據廬州不敢舉兵逼江者懼錡乘其後也江南由是稍安

劉錡自順昌之勝金人畏之下令有敢言其姓名者罪不赦

有金使館宋都亭驛與其副飲酒其副不肯飲訶之曰酒中安得有劉四廂何不飲有使金者見其廐卒怒詈馬之不食草者亦云然蓋其威名素著於南北如此

乾道中吳曦嘗校獵塞上一日夜歸垂鞭四視時盛秋天宇澄霽仰見月中有一人騎而垂鞭與已惟肖問左右所見皆符因揚鞭而揖之其人亦揚鞭而揖曦乃大喜遂起異志於是乞夢於文昌帝君帝君曰大事已付安丙曦與丙謀丙佯許之踰月丙誅曦傳首

臨安

耶律大石遼太祖八世孫起進士擢翰林承旨遼末合精兵萬餘將

出西域遣甘州回鶻王畢勒哥書曰昔我太祖北征至卜古罕城
卽遣使至甘州詔爾祖烏母主曰汝思故國耶朕卽爲汝復之汝
不能返耶朕則有之在朕猶在爾也爾祖表謝以爲遷國於此十
有餘世軍民皆安土重遷不能復返矣是與爾國非一日之好也
今我將西至大食假道爾國其勿致疑畢勒哥得書卽迎至邸大
宴三日臨行獻馬六百駝百羊三千願質子孫爲附庸送之境外
西夏土主廟明時重修定襄伯郭登撰記以爲六丁之神按神稱西
夏土主忠武王王爵也忠武諡也土主司土者西夏國號也宋史
西夏有齊國忠武王李彥宗係元昊之裔子遵頊繼夏統改元光
定者蓋尊及父祀爲土主耳今廟像已改袞冕去羊首等飾
回鶻自唐末據甘州歷五代至宋率入貢天聖中并於西夏而宣和
中猶有貢者其可汗皆稱外甥可汗而妻并號天公主也又有見

甘肅新通志

卷九十七

志餘 軼事

十六

於遼者蓋西夏受其貢賦而不盡奪土地云爾

元帝師八思巴自其祖朵栗赤以其法佐國主霸西海者十餘世八
思巴生七歲誦經數十萬言能約通其大義國人號之聖童故名
八思巴少長學富五明故又稱曰班彌怛歲癸丑年十有五謁元
世祖於潛邸與語大悅日見親禮中統元年世祖卽位尊爲國師
授以玉印命製蒙古新字字成上之其字僅千餘其母凡四十有
一其相關紐而成字者則有關韻之法其以二合三合四合而成
字者則有語韻之法而大要則以諧聲爲宗也至元六年詔行於
天下

刺麻膽巴幼從西天竺古達麻失利傳習梵祕得其法要中統閒帝
師八思巴薦之時懷孟大旱世祖命禱之立雨又嘗呪食投龍湫
頃之奇花異果上尊湧出波面取以上進世祖大悅至元末以不

容於時相桑哥力請西歸既復召還謫之潮州時樞密副使月的迷失鎮潮而妻得疾膽巴以所持數珠加其身卽愈又嘗爲月的迷失言異夢及已還朝期後皆驗爲成宗禱疾遄愈賜與甚厚且詔分御前校尉十人爲之導從成宗北巡命膽巴以象輿前導過雲州語諸弟子曰此地有靈怪恐驚乘輿當密持神呪以壓之未幾風雨大至衆咸震懼惟幄殿無虞復賜碧鈿杯一大德七年夏卒皇慶間追號大覺普惠廣照無上帝師

正甯要冊在湫頭鎮宋太宗卽位使臣有過此者夢神告曰晉王卽帝位矣至京兆果得卽位詔入汴京奏之勅立玉牌其黑如漆其光如鏡至正元年指揮曹倫上酒一瓶銀牌一面至天順六年通判陳英禱雨謁湫潮出酒牌上鐫字賜于通判陳英其至正元年號曹倫姓氏如新鐫焉

甘肅新通志

卷九十七

志餘 軼事

十七

元至元元年甘州路十字寺奉安世祖母別吉太后于內定祭禮蓋太后亦在甘殂者

元順帝生于甘州僧寺按宋少帝降元時方六歲封瀛國公尙公主其後有請誅之者公主以告瀛國乃請爲僧易名合尊至元二十年學佛法於吐蕃年十八後奉詔居甘州山寺有趙王者憐公贈以回回女子延祐七年庚申生一男時公已五十矣初元明宗爲周王違仁宗旨逃之漠北與瀛國締交瀛國之子妥懽帖睦爾有異徵明宗乞養爲己子並納其母後卽帝位二年見弒文宗立詔謂明宗在朔漠素謂妥懽帖睦爾非己子徙之海島又移廣西文宗傳甯宗不數月而殂太后命立妥懽帖睦爾卽順帝也而實趙氏之子萬季野輯庚申君遺事考之最詳

明設茶馬金牌一十六面以其上號藏內府下號給曲先等四衛及

申藏等十三族其文左日皇帝聖旨右日不信者斬每三年一遣京官齎奉合符凡徵馬三千五百匹上馬酬茶一百二十斤中馬七十斤下馬五十斤歲給甘鎮馬千九百匹以供征操

景清正甯人洪武甲戌進士官左都御史當建文遜國文皇卽位因欽天監奏異星犯帝座適清緋衣懷利刃入搜得被縛清躍起詈曰吾所以不死者欲以報仇也豈北面事亂賊耶命抉其齒且抉且罵血噴御衣帝益怒命割膚剔肉以鐵帚貫之以芻繫長安門是夜帝夢清繞殿追逐心惡之旦日輦過屍側繩忽斷屍行三步作犯駕狀乃焚之而滅其族

景清在國學時嘗假同舍生祕書約一夕還故爽約其人訟之國子師清詭曰某私橐耳誦之不遺一字其人反無記大慙恨旣出特還之曰公甚祕惜聊相戲耳

甘肅新通志

卷九十七

志餘 軼事

十八

白醉璣言張三丰在甘州留三物於觀中一爲蓑笠一爲藥葫蘆人有疾者或取一草投其中明旦煎湯飲之立愈其三爲八仙過海圖中有壽字有都指揮得之懸於堂一夕親故假宿聞海濤洶湧聲以爲黑河壩倒旦告主人怪而物色之始知聲從圖中出也後皆中貴取去

臨洮府城東總真觀馮真人修煉處內有石枕黃潤似玉鄉人老幼或有疾捫此枕而愈

山丹髮塔寺東西祠額有匾書一禪天三摩地七珍池九華山獅子窟象王家碧蓮沼紫竹林筆致圓潤直逼趙子昂不書姓名相傳
明初靖難翰苑孤忠流亡至此所書

齊文淮皋蘭人赴禮部試卒於洛陽旅次同里王健送其櫬歸日暮投宿逆旅主人迓甚恭見櫬駭曰吾昨夕夢城隍神寓此客得毋

齊姓耶

探花黃諫皋蘭人俗傳質甚鈍得狐丹乃穎悟狐失丹死瘞於華林寺後立石鐫字曰黃室狐氏之墓或黃公妻姓狐而流俗附會云然歟然不可考矣

明正統時寇入靖虜衛境操守官牛魯禦敵陳亡平灘堡民韋繼善適飲於遠村及歸聞之攘臂歎曰酋奴殺我長官要我等百姓何爲遂獨乘皮袋渡河追殺數人割其首而還

明景泰間有李姓者至古靈州城東北鐵柱泉傍有窟偕一僕爇燈以入行二十步推開一石門有銅鑄釋像傍有二僧屍覆以錦衾其面如生而金貝之類環具左右李恣意取之將出風颯颯燈息門閉鼓鈸齊鳴李恐懼欲死盡棄所取者俄於傍窟匍匐而出明日集眾往掘之堅不能入

甘肅新通志

卷九十七

志餘 軼事

十九

靜甯人黨禮村居時偶夢一虎伏其門出視之則一徒步省試生倦息也禮延入款洽贈以騎驢會生登科禮復資其公車情誼甚篤生成進士後官至總制卽金城彭澤也赴任之時先謁故人當是時黨家河灣冠蓋如雲禮死猶展其墓云靳賢之通判潞安也有一童子與處女曖昧成訟賢視童子期爲大器因平其訟諭之曰男未婚女未嫁合之雙美吾爲若月老矣當官成禮遂偕花燭賢旣歸里數十年後其姓名亦忘之矣一日傳固原總制臨其門持門生刺相見賢辭曰吾無此門人大人誤矣總制強進賢亟趨迎入門猶不識總制拜跪曰老師忘門生耶門生卽某年前潞安府童生郜某老師爲成婚姻者也賢始驚謝郜卒厚報此二事可爲好行其德之勸

總督彭澤知徽州府日嘗過歛造越國汪公神祠夢著白衣人獻上

梁文乃是狀元明日唐皋果來獻文而以貧故藍衫改色成白彭大奇之與交驩後任總督當會試揭曉時知殿元必皋報者至而轅門正欲羣戮人乘喜盡宥之

山丹縣城西街有前明奮威將軍指揮武振第前庭五楹梁棟威壯內懸匾額有威遠二字大三尺許點畫雄健直逼鍾王旁小書彭

澤題

段炅號河濱南陽知府堅次子宏治十八年進士授翰林院檢討劉瑾亂政炅與大學士焦芳吏部尚書張綵等附之瑾敗落職時武功康海官修撰鄆縣王九思官吏部郎亦坐瑾黨廢炅及海九思並以文學鳴世稱關中三老年八十卒所著有河濱集

明西甯千戶李某家丁有李未苟者膽勇過人才技尤絕善長矛擲索能於五十步外縛人馬故臨戎能以少勝多敵望旗畏避千戶

甘肅新通志

卷九十七

志餘 軼事

一二十

善相馬正德七年閏五月夷犯西川一黑面金環酋騎白馬橫長矛呼吼馳驟數逼官軍勢甚武一軍色動千戶見之謂李未苟曰賊所乘良驥也若持索俟近河灌木南我挾一矢馳誘之酋逐千戶灌木回射中酋喉未苟擲索獲其馬千戶乘之喜日報効之力也後千戶剿番遇害未苟亦從死焉

何大復景明年十二以父任臨洮府驛丞隨侍至臨洮太守李紀聞其奇召置門下爲延師授春秋

戶部主事李夢陽慶陽人上疏指斥弊政反覆數萬言內指外戚壽甯侯尤切至疏入皇后母金夫人及張鶴齡深恨之曰泣訴於上前上不得已下夢陽獄科道交章論救金夫人猶在上前泣涕求加重刑上怒推案起旣而法司具獄詞以請上徑批夢陽復職一日劉大夏被召便殿奏事畢上曰近日外議如何大夏曰近釋李

夢陽中外歡呼至德如天上曰夢陽疏內張氏二字左右謂其語涉皇后朕不得已下之獄比法司奏上朕試問左右作何批行一人曰此人狂妄宜杖釋之朕揣知此輩欲重責夢陽致死以快宮中之忿朕所以卽釋復職更不令法司擬罪也大夏頓首曰陛下行此一事堯舜之仁也

李夢陽應詔陳言未及壽甯侯張鶴齡怙寵殃民繫錦衣衛獄旋釋之出遇鶴齡大市街乘醉唾罵揮鞭擊之墮兩齒鶴齡隱忍而止江南潤州丁璣督學廣東學政渡江有司具牲醴請祀水神璣笑曰舟乎或沈或浮神何預焉至中流風浪作而舟覆李夢陽督江西學政渡江有司亦以請夢陽怒令從者縛神投諸江且曰水神而投諸水得其所哉竟無恙

正德初劉瑾亂政以康海同鄉慕其才欲招致之海不肯往會夢陽

甘肅新通志

卷九十七

志餘 軼事

一二十一

下獄書片紙招海曰對山救我海乃謁瑾瑾大喜爲倒屣迎海因設詭詞說之瑾意解明日釋夢陽踰年瑾敗海坐黨落職

衡岳爲慶陽知府益以清白自勵民愛之如父母僚友諸婦會飲岳之妻亦與焉在席者金鈿綺繡爛然獨岳妻荆釵布裙而已旣罷頗不樂岳問曰汝坐何處曰首席岳曰旣坐首席又要服飾華好富貴可兼得耶慶陽人至今爲美談

楊椒山尉狄道時門生五十人姓名具存兌換黎氏地券中今具錄

之李自發

舉人

杜臻泰楊凌奎馮大賢陳汝聽陳情田東曉劉從義

魏大振袁鯤田劭耕劉繼紳張儒茂王綸楊啟元陳恂李維芳余

濟川苟文選張燧張問仁李梁季廷瑞郭永吉張文曜文來鳳陳

怡楊廣棟

以上俱貢生

王朝相趙璧宋誥莊宗禹郭啟蔣汝廉馬遷李

大學王楠孫學詩趙任聞善言劉大莊李尙忠李永璧單宗敬李

應箕李維芬李東許尚賢雍不敏劉完以上俱諸生開煤山時同往者四人指揮使李子節門人則李維芳陳恂宋誥其先以煤利白府縣者則諸生張汝言也又指揮陸恩朝夕請益並捐銀米助書院經費

張萬紀嘗遊嶽樓山神祠門有秦檜與其婦像萬紀拜神時從人誤以香置檜前萬紀怒曰檜萬世之奸余恨不手擊之乃反以香火供耶及令人往取香則二像爲香火延熱煨燼矣人咸驚以爲異嘉靖閒靜甯州務本里人倪姓妻某氏年七十有四生子自謂不祥欲不舉賴族媵以存後氏年百四十六歿其子已年七十二矣子名恕

郭敦靜甯人居一夜夢人邀至翠屏與之祕豆數合令將去敦夢中省識以爲此痘神遺也因持至站院見回民家曰若輩無神盍

甘肅新通志

卷九十七

志餘 軼事

一二十一

與之因盡與散而以其餘擲犬豕既而回雛犬豕多出痘斃故知茲事之爲神司非妄

張侃固原衛人其家居七箇山嘉靖三十年春有堪輿士過其莊上下相度謂侃曰此山若建塔當主斯郡文風日進科第聯翩侃應之曰若然當勉從於是竭資鳩工閱一年而告成塔高五丈餘自題曰瓔珞寶塔至今猶巋然咸謂北峰文筆

肅靖王眞於博雅好文善爲詩有盛唐風格言邊塞事尤感慨有意嘉靖三十四年春合水民李仲金云夜半爲呂純陽所度行至華池驛不欲往呂卽遣歸且告之以毋悔繼復念之一日日將晡時金方自外歸見呂坐於場急趨之呂手挾石碾欠伸而起忽失所在明日視之則手印已入石半寸許矣

萬曆二年甃甘鎮城據委官楊槐等稟稱修至南面剝削垣牆見露

木榷骸骨長二尺餘寸約有五百餘柩其西面垣內亦有前項骸骨柩無數將謂前代孩童又有男女衣冠貴賤疊至宛然齒顙可疑就中一棺面書至大元年閏十月甯夏王妃紀號等因巡撫廖逢節總兵李震太僕寺卿郭文和分巡道徐節都司李應祥周鎮等爲之改阡並以文祭之曰王公設城專以衛民惟靈歸葬當另佳城云何眾骸在此垣中今奉皇命甄砌新工剝削垣膚卽見攢叢數百鱗柩不分西東風雨零頽何保屯蒙其爲軀殼三尺不盈在我明時若小兒童拳顙堅齒聞見相驚柩木衣冠尙有辦徵何代何國爲此瘞靈非時故忍爾爲鮮終中有一柩尤爲可駭紀年至大甯夏王妃墨識棺首不主不婢又有數柩紗帽冠首圓領襯衣頭亦拳顙生亦皆貴死竟同埋若謂胡俗不知瘞埋若爲漢家何瘞牆隅事雖可怪枯骨則一而今而後諭我官軍不得修砌存

甘肅新通志

卷九十七

志餘 軼事

一三二

安汝魂若果淺露爲爾卜瑩而今而後在城在瑩各相護保永妥幽冥按此事殊怪元至大初修甘州城安得此千數小兒悉埋其中或以城築難就羅取以作鎮壓究未可解

靖虜衛指揮李寵嘗攝監牧同知廉介不擾有殺人者逃匿不獲寵

牒諸城隍後一年蘭州獲一人自認其事卽移解成獄

按寵卽參將光啟子

又嘉靖初衛有殺人者獄累月不決鎮撫牛奎光亦禱諸城隍夜夢一鴿飛集鄰人屋上奎光寤曰賊其在葛氏乎訪之得其僕名安慶子者一訊卽明株連盡釋二事人皆以爲神感

潘海虞光祖蘭州人嘗參議山右是時山西巡撫則蔡懋德也潘嘗輯廣輿通志後懋德子方炳增補而另梓之遂攘爲己書今海內盛行無知九霞之爲齊邱者矣

吳咬兒慶陽衛舍人身長六尺力勝千斤能以背攀石獅子行數百

步手折水牛角嘗在延安市以一杖敵百人

張孀乾十慶陽衛舍人膂力剛強能以手提碌礮尤精武藝嘗匹馬出塞與數強敵力戰敵敗復追出邊牆而返敵人以孥羅稱之

任綸安化人身高九尺膂力過人嘗扛石臼千斤一日運糧至甯夏黃河爭渡以繩負車箱米於背以登舟爭舟者斂手讓焉嘗用拳擊牆牆隨手仆而手無恙百夫不能當其勇然爲人慷慨剛方重於鄉里且善自韜晦有侮之者微哂之而已唾其面亦不赤以此終身無禍患

麻武甯夏右所人身小力悍能以兩手掌託二人行如舞嬰兒及伏兩手指於地手背亦能立二人於上拉之行掌背隆起不陷人服其力又善琵琶時陳陞以簫名故陞雅與結納盡忘形勢無何身嬰惡疾垂十五年始愈而前力不啻文通之才矣

甘肅新通志

卷九十七

志餘 軼事

一二十四

馬珣合水人力勝千斤嘗提石臼由山麓以達高原十餘里不動聲色時人異之

仙姑係孝女得道近村有媳逆其姑經仙姑顯靈懲殛聞者無不感化萬曆丁丑巡撫大司馬侯東萊修廟碑記可摩錄者半篇內開甘鎮北堡名曰板橋境外廟曰仙姑究所從來自漢大將軍霍去病和戎之後百姓始得耕耨見一女身體軒昂穹然有不凡之像因黑河源水泛溢非舟可渡設板以濟人斯民不病涉而河之西北亦且耕行稱便利姑之功不在大禹下但歷時既久水發橋崩姑亦隨水而逝其英靈不昧或顯身於晝夜或行施以風雨民感其靈尋屍而葬立廟以祀風波旱潦隨禱卽應時而鐘鼓自鳴空中有管籥音一日風雨大至廟前現一鐵牌上書平天仙姑仙姑之稱由此始

崇禎四年二月二十五日流寇神一奎劉六子等夜半至合水從北城入殺戮甚眾五年知縣施喬柎招撫復業七年過天星賊十萬圍慶陽三晝夜總兵曹變蛟領兵從南殺入斬賊首數千圍解是年飢民死無數十四年正月內流寇賀宏器齊三詐等率眾萬餘暗撥合水城下防兵沈應時郭一學斬獲渠魁齊三詐等百餘級走之二月十五日平明火燒城門直入城內殺戮之慘更甚於四年人民星散止餘空城由是縣治遂廢官居皆堡民竄山谷間荆榛滿目虎狼爲穴前後二十餘年

明季流賊陷蘭州肅王走河湟萬山層疊值夜難進忽見燈火出茅舍閒遂望門投止一姥迎入持火進具及曉視之乃在灌莽中知爲神額拜而去

明末狄道民有依南山居者婦有孝行失其姓氏一日有虎入室瞰

甘肅新通志

卷九十七

志餘 軼事

二十五

其姑時婦方作食急執麪杖趨衛之虎逸去姑得免

狄道州北石井峽山曰龍塹上有姬娘娘廟相傳爲明季姬氏女許字里民某未嫁某卒父母復以許人及將醮女潛逸父母踵之至山前見女跌坐大石而亡容色如生父母異之各以所執木杖植其旁祝曰爾果有靈以此杖爲驗若能成蔭當爲立祠已而果然遂卽其地爲廟有禱輒應

國朝順治時狄道有鐵工文石哥者家甚貧年三十未娶母恆以爲憂石哥日市酒肉以供母復歌舞以娛其憂後有人以古鋌金狀如鐵託造器物金留而人不至石哥遂以饒裕意者神憐其孝而貺之乎

甘州城中鎮遠樓俗曰鼓樓亦作鐘樓順治中爲米逆所燬七年重修陶甃已具而艱於輸運執事者以白靖逆侯張勇曰第飭爾事

甕易致耳俄飭五部兵自陶所鱗次立抵樓下右者輸左身不動而第以手授不終日而甕悉致土人傳之以爲靖逆籌略之一斑云
傭工雷某賦質襁褓人呼爲大孩保每得肉食果餌輒裹以遺其母傭主義之特厚其食與他傭異

順治十年合水知縣劉源澄任事見固城小堡不堪居治移駐西華池假察院舊署以居十四年知府楊藻鳳副將李正芳及源澄各捐已俸申文修復城垣官署始得重新於是四鄉人民入城居住者近三百餘家

祝囊台吉者故綽庫兒巴什之別部也多機智過甘州每殺掠有一二諸生持羊酒勞之喜曰所過不見有若此此何如人左右日讀書秀才祝囊曰秀才知禮天下者天子之天下何爲天子大臣諸

甘肅新通志

卷九十七

志餘 軼事

一二十六

生日唯有德者居之曰何爲有德曰不殺不焚不擄掠祝囊捧服大笑曰如是耶策馬去戒帳下不得更踰邊犯一草一木過其少主愍頓曰學佛經不如學漢人經近邊有秀才可請爲師傅愍頓從之由是近邊諸郡多厚幣延老學究講四子五經

康熙八年耳陽溝民石哈哥於教場內見一童攜簸箕賣餅手中有首飾銀一塊乃食其餅數枚給以到家給錢至茶埠峪用磨石擊死取簸箕等物而歸是夜聞號哭聲從簸箕中出乃拋之屋上其哭愈甚哈哥膽落潛往林中避之鄰人疑其家有異相率而來見屋上簸箕血痕斑斑哭聲且未已也旋於林中見哈哥若風魔狀適逢米氏訪其家僮進福子眾語以故遂縛哈哥並簸箕鳴之於副使高某訊之得實乃以大杖立斃之

康熙十三年冬王輔臣叛十四年平慶道差役於新正月初四日至

隴西王某孤貧且老眇目營賤業以自活所居韓家川去汪家衙十里許中途多小石每至蹶躓因念千人梗足苟昏暮行則皆吾若矣遂發願除之揀拾道旁纍纍成堆者數里竟成坦途已而忽目明則一善之報也

楊全兄弟四人家甚貧父好飲博每適市兄弟各湊錢供小費將來則輪候於道或值醉罵人扶父歸家輒走跪其門人以是不校其父也後居喪甚哀鄉人稱之

王雨堂善青烏術甯夏郡城象鳳形以東郊高臺寺爲鳳首層臺峻宇地勢雄勝前建危樓翼然於上咸豐丁巳郡有富室某嫌樓地狹隘宴會局促擴爲三楹雨堂以語人曰高臺寺爲鳳首前樓鳳口也茲以讌飲之私妄更古剝鳳口受創五年後大劫至矣人有笑其耄而迂者咸豐庚申雨堂歸道山越癸亥郡遭回禍幾無子

甘肅新通志

卷九十七

志餘 軼事

三十七

遺此臺亦毀於火

陶宗義輟耕錄回回有年七八十歲老人自願捨身濟眾者絕不飲食惟澡身啖蜜經月便溺皆蜜旣死國人殮以石棺仍滿以蜜浸鐫志歲月於蓋瘞之俟百年後啟封則蜜劑也凡人損折肢體食少許立愈國人亦不多得俗曰蜜人回語木乃伊

烏斯藏僧曰擺布哈者住馬蹄寺歲收黃番黑番添巴之資以輸西藏達賴喇嘛按添巴者添鉢也巴音之轉也又諸番牽牛羊持酥糈詣寺飯僧曰熬廣茶

周福官名尙文姑蘇人自少以善歌徵入甯夏故提督師某家旣而師某下世其諸子皆幼家業中衰值震劫後益式微茅屋析居諸伶皆散去尙文舊養於其三子獨不去爲總內外家事其子素好客雖落魄座常滿尙文以俳優所出資其酒肴未嘗缺當道知其

事交稱之每演劇賚予恆異於他伶尙文悉以奉其主日用以故其主夫婦雖老不困憊及沒後殯葬亦多出其力

林秉義無錫人亦提督師某伶也諸伶旣散秉義事師氏永潮永濤二幼子務種蒔善貨殖當師氏家破敗而褐衣粗食內外給足不使匱乏秉義之力也已而二子年齡漸長宜就傳脩脯且無所出秉義賣其妾獲二百金運籌其間爲二子力學之費十餘年二子先後入泮而永潮尤有文望後秉義年五十餘卒

王有仁隴西寨子河人以善歌名於省垣中年無嗣其兄有義爲買一妾乃其夫以貧鬻者也偕有義送諸省有仁入房婦悲泣不已詢之始知顛末遽出尤其兄令他婦與伴次早呼其夫還之不責直衣物盡與焉並給路貲遣之旋里

趙長兒秦安隴城伶人也同治初土回四起隴城介處二巢閒長兒

甘肅新通志

卷九十七

志餘 軼事

三十八

居母喪將往祭墓墓隔賊營一夜潛詣營門伺門者困睡扛門側巨礮轉向內竊發之賊中驚擾竟夜因得越營拜掃往返無阻焉他日復帶劍馳往數賊驟馬追之長兒拜墓已躍起決鬪且戰且走將及鎮城城上人皆雷喊轉戰移時手斬數賊而死

同治壬戌河東回亂甯夏郡城戒嚴大府檄守備韓衍儒率兵五百來郡防守韓之猶子某精六壬課卜之不吉力勸其叔假歸韓弗聽癸亥歲十月二十日某晨起赴市踉蹌歸泣告叔曰禍兆見矣曷偕往叔怒叱之出某卽秣馬潛行至中衛暫憩以俟二十四日城陷有避難至者某詢其叔已殉難矣泣語人曰吾前日晨赴街市見太陽初升赤色如血人影在地大半無首駭極而歸欲明告之恐惑眾聽不意吾叔不悟而慘罹此禍數定如此夫復何言語訖急策馬西行去

固原中營參將景文之母郡主也就養在署同治二年元日城陷後合家遇害惟郡主以年老得無恙日行乞賊營夜棲止窟洞藍襖情形見者不忍目覩四年提督雷正綰駐軍固境物色得之厚爲資給派弁護送入京

同治六年回匪蜂起合水縣民食搶掠殆盡七年城中乏食兵糧不濟四月十二日賊由葫蘆靶上入城知縣楊炳華朝衣大堂被賊戕家丁李二隨死焉一時縣無主人民殺斃餓死者十有六七是年七月十二日城又陷賊由東城濠入人民逃盡止餘空城八年夏知縣廖紹銓到任多方招集城內止有二三十家

同治九年十月初九日夜賊襲山丹城舉火火光中隱隱有穿黃衣執黃旗者在城上往來是夜被賊虜去者逃回言先是賊遠來距城約四五里恐驚動近城居民城中有備先發二百騎約定入城

甘肅新通志

卷九十七

志餘 軼事

二十九

舉火爲號大隊繼進賊入熱火三層樓等處火光燭天外賊未之見且言馬頭到處有數仞深崖阻當不得前進至曉近城其入城者已被民勇暨統領某擊退矣城之不陷屬有天幸

承平日久人不知兵回匪之變甘疆庶民往往十數人執兵而逃一賊騎逐之叱之擲兵卽擲之跪而乞命任賊戕殺而不知鬪

回匪初起揚言入城者屠安居者免愚民信之不從清野之計攜眷入山謂城爲天生圈被賊虜掠後逢世變卽當清野此可爲前車之鑒

隴西郭峻前明進士兵刑兩科給事中郭充四代孫也家富有世居北關米家巷由武生遵例捐遊擊性慷慨樂善郡城東郭外有佛兒橋年久傾圮峻出資修之民不病涉建府學宮費千金光緒癸巳賀蘭王使弁查隴西有郭峻否爲何事業弁稱妃有孕將臨盆

王夢閻者投刺隴西郭峻拜騶從甚盛及覺報後庭舉一男王異之使查嗣有人至自賀蘭云見其子已十餘歲品格異常聞者以爲作善之報

山海經三危之山三青鳥居焉是山廣圓百里青鳥主爲王母取食陶詩翩翩三青鳥毛色奇可憐朝爲王母使暮歸三危山我欲因此鳥且向王母前在世無所須惟酒與長年李詩遙裔雙彩鳳婉變三青禽以歡秦娥意復得王母心

爾雅鳥鼠同穴其鳥爲鶖其鼠爲鼯山海經鳥鼠同穴之山其上多白虎白玉濫水出於其西多鰲魮之魚其狀如覆鉢鳥首而魚翼魚尾音如磬石之聲是生珠玉

崆峒元鶴仙禽也世居東巖洞中頂冠丹砂緇衣元裳翅如車輪翽翔雲表黃帝問道於廣成子與聞至道帝堯甲申年有雙元鶴至

甘肅新通志

卷九十七

志餘 軼事

四十

是屢見於世歷今已四千數百年矣

錄異傳云秦文公時武都故道雍南山有大梓樹文公伐之輒有大風雨樹生合不斷時有一人病夜往山中聞有鬼語樹神曰秦若使人被髮以朱絲繞樹伐汝汝得不困耶樹神無言明日病人語文公如其言伐樹斷中有一青牛走出入豐水中其後牛出豐水中使騎擊之不勝有騎墮地復上髮解牛畏之入不出故置髦頭漢魏晉因之

李廣與兄共獵於冥山之北見臥虎焉射之一矢卽斃斷其髑體以爲枕他日復獵於冥山之陽見有臥虎射之沒矢及羽進而視之乃石也其形類虎退而更射鏃破斨折而石不傷

元封中大秦國貢花蹄牛其色駁高六尺尾環繞其身角端有肉蹄如蓮花善走多力帝使輦銅石以起望仙宮牛蹄在石上者皆如

蓮花形故陽關之外有花牛津時輦得異石長十丈高三丈立於望仙宮因名龍鍾石武帝末此石自陷入地中尾出土上今人謂龍尾墩

天寶時宮中畜一鸚鵡聰明能言一旦羽毛憔悴上憐而問之頗思鄉否鸚鵡應聲曰以思鄉故如此命放之隴山後使臣過隴山忽聞樹上有聲問上皇安否視之則鸚鵡也使臣不覺淚下

青海周回千餘里海內有小山每冬冰合後以良牝馬置此山至來春收之馬皆有孕所生得駒號爲龍種必多駿馬吐谷渾嘗得波斯草馬放入海因生驄駒能日行千里世傳青海驄者是也

狄道州有胭脂川相傳呂布赤兔馬產於此

甘州產醉馬草馬食者輒如醉不能移足以其根及根旁土煎湯灌之乃醒又多馬雞松雞他喇卜花及鹿兔黃羊青羊之屬

甘肅新通志

卷九十七

志餘 軼事

四十一

扁豆口南五十里有野馬川出野馬古所稱駒駮者也俗呼野驃子唐貢其革曰野馬之皮

張掖城南四十里積沙如撫夷東磧先有鐵槍半出沙外每童子牧其側輒聞呼問曰我何年出童子不答以語人人曰但應之驢年乃出耳後童子應之如其言俄童子潰腹死而槍不復見張掖南山下有地產羊皆四角以他羊置其地產羔亦四角以其羊移他所所產羔兩角如常羊地氣然也俗傳食四角羊忌八角茴香又云閒有五角六角者

西域以羊臍種土中漑以水聞雷而生臍繫地內及長驚以木聲臍斷便行齧草至秋可食臍內復有種此物之至奇者也而人或多未之信史記大宛傳正義引宋膺異物云秦之北附庸小邑有羊羔自然生於土中候其欲萌築牆繞之恐爲獸所食其臍與地連

割絕則死擊物驚之乃驚鳴臍遂絕則逐水草爲羣劉郁西行記亦言之或云穀種羊出丹噶爾廳地近今無聞豈其種竟絕歟平番縣後迤溝一名冒古堆土山重疊高聳數仞山之中小川橫斜徑似桃源居民數處俗呼爲黃羊川夙產野黃羊肉美性熱冬月食之善治寒喘病其身細其行速搏之不易每結隊而來竊食禾苗民苦之攜槍守苗擊必中其心胸乃踣若中他處仍負痛疾馳不可得也然夏月生羔羔穉喜酣睡人見之可抱而歸飼以牛羊乳便活稍長食草倘牧放山中遙望黃羊卽隨之而去其野性之不易馴如是以故獲之者輒烹食焉平遠縣韋州一帶亦多有之平番縣東西石山又有一種石羊角長色青夜伏半山石罅晝食草不害禾稼行石山疾如猿若行土山反不如黃羊之敏捷獵者利其皮與血輒以槍擊之羣羊見其斃也環而守之不忍去若有患

甘肅新通志

卷九十七

志餘 軼事

四十二

難與共之義乘閒連擊可得數羊熟其皮以製衣雖溼水仍柔輒曬其血以醫疾卽沉疴亦痊瘥至辨其真僞之法以乾血少許置水盃中便化紅綫一根與藏紅花同蓋均爲破血和血良品故試驗亦相類耳其僞者入水卽散爲紅暈無此綫焉

曲端有馬名鐵象日馳四百里愛之甚於子息有武臣康隨者嘗以事忤端鞭其背遂深憾之及端在恭州獄張浚以隨提點夔路刑獄端聞之曰吾其死矣呼天者數聲又連呼鐵象可惜者復數聲旣死不旬日鐵象亦死

青海駐牧蒙古見海中有物牛身豹首白質黑文毛雜赤綠躍浪騰波迅如驚鶴近岸見人卽潛入水中不知其爲何獸也

西域蒙古祈雨以砮答一作鮮答浸水中呪之輒有驗其人亦名砮答氣砮答生馬牛驢羊諸畜腹中在腎者尤良形似鸚哥嘴者爲最重

大可如拳色或黃或白堅如石生畜腹中畜漸羸瘦久則死生剖得者爲靈物尚書宋牧仲筠廊偶筆載崇禎甲申七月季家馬生卵紅白相間重三觔小者觔許凡三枚大者如升質色如雀卵考之書凡獸皆有之名曰砮答治奇疾難名者生牛馬腹中者良觀此可知砮答古已有之且不特可以祈雨兼可治疾也

兩當有鳥羣飛首如簫管二月從北向南八月從南向北春來種禾秋來種麥土人名伎兒鳥

兩當縣東五十里有魚洞一名長春洞每歲暮春魚湧洞中而不出知所從來又成縣仇池山亦有神魚洞每年清明後連貫而出土人取之

西和縣離石堡鎮南二里許石壁千仞洞口方廣約一丈俗傳舊有大蟒人不能入號曰蟒洞

甘肅新通志

卷九十七

志餘 軼事

四十三

虎之威能役鬼以爲俚俚之癡轉導虎以傷人成縣嘗遭虎患彪者虓者白晝羣行鼓脣礪爪覓人是啣爲虎傷者百十其列知縣黃泳爲文禱城隍虎少斂又憫俚鬼之愚設齊醮超拔以去所憑其有冥頑者則募善射手操窩弓毒矢從事殺十數虎而患息

光緒三年秋蘭州河北廟灘忽來一蛇長二尺餘赤色方頭無鱗角見人不驚居民以香盤迎之卽蜷伏其中捧置龍王廟香案上去亦不食或曰此河神大王也縣官聞之前往致祭越數日倏不見

光緒三十年夏六月河水陡漲靈州峽口龍王廟被沖並決長埤十數里先是客從峽口來見水面浮一物頭方身如蛇狀未幾水漲聞山東河南有謂之大王者見必大水此殆其出見也

海城縣署有犬名三五兒者以義稱知縣惠福豢養備至遣內童三

五兒專飼之光緒乙未五月監犯李倡法句結河回劫獄戕官童三五亦遇害犬識傷童之賊尾之噬其足賊遂斃焉人以犬能復讐以童三五名之時大堂被賊燬新任僦居民房犬日夜守署不稍離凡有回民入署卽怒吠之嗣衙署重整僕役漸繁而署後空闊向有墩臺犬夜臥二堂後墩臺聞響卽吠俾人驚覺巡查而後已後署外羣犬互鬪犬奔赴如排解狀竟爲羣犬所傷袁範命瘞之東郊名爲義犬塚時署內飼八犬皆其所遺種晨則齊聚二堂日夕時二門臥其一東院臥其一西院臥其一三堂院臥其一餘則同臥後院墩臺稍聞人聲一吠羣應不容進內其分班值宿一若各有專司者噫異矣

敦煌新錄虜蘇割刺答魯之右大渾中高百尋然無草木石皆艷色山產椒大如彈丸燃之香徹數里每燃椒有鳥自雲際踰躡五色

甘肅新通志

卷九十七

志餘 軼事

四十四

名赭爾鳥蓋鳳凰種也漢武帝遣將軍趙破奴逐匈奴得其椒未能解問東方朔朔曰此天仙椒也塞外千里有之能致鳳武帝植之太液池至元帝時椒生果有異鳥翔集

博物志陸機與弟雲書曰張騫爲漢使外國十八年得塗林安石榴種元稹詩何年安石國萬里貢榴花迢遞河源道因依漢使槎抱樸子云五原蔡縱入山而還語其家人曰到崑崙山有玉李形如世閒者但光明洞澈而堅以玉井水洗之便輒而可食

匈奴有斗入漢地直張掖郡者生奇材木箭竿就羽王根爲大司馬使使者往匈奴囑令自以意求之單于曰此温偶駱王所居也未曉其情狀請使遣問之已而報曰已問温偶駱王匈奴西邊諸侯作穹廬及車皆仰此山材木且先父地不敢失也按此山今府北合黎山也就注云雕之大者

臨洮府治西數百步昔有杏樹一株垂蔭張蓋每夜靜枝間嘗現光
宛如列炬金大定五年西域異僧白於眾伐樹驗之有石佛從地
湧出因建寺名曰地湧明嘉靖己亥郡守李南墩因寺僧坐法徑
毀之

張掖城西七里有楊五歧大數十圍高十餘丈甘樹差老者輒多枯
枝氣寒故也而楊蔚茂異他株無鵲烏巢有往伐者輒病且死土
人神之號五枒杷樹亦云五枒杈樹城西北鴨子翅有古榆大倍
之云千年外物也

合黎山產材木康熙十一年參將石福逕山中見多茶樹乃遣僮往
牧馬隨地採製市之陰獲厚息南山亦稱有茶而其性頗溫與茶
不類

甘山巡道莊廷偉以衛輝知府陞任來甘寄弟西安知府祖詒書云

甘肅新通志

卷九十七

志餘 軼事

四十五

邊隅風土與中州迥殊四月維夏樹頭始得見青梧桐一葉落滿
林憔悴矣風嚴霜凜不待鬢發已然大約秋涼冬冷之氣多余只
概以春溫煦之姚端恪公詩常覺胸中生意滿須知世上苦人多
吾身一小天地陽春有腳詎不在腔子裏耶如此間沍寒天生一
種氍毛羊皮大者最長二毛三毛以次第別男女大小一領披身
便可卒歲產最繁價最儉吁死羊皮尚可煖于人生人之情奚可
冷于世慎勿以人而不如羊也

甘州南山黑水以東皆黑番其西黃番黃番者故韃靼族皆元之支
庶也明季奏徙甘州南山黑番者羌種今西甯涼州諸番皆其類
也黃番俗呼黃韃子黑番俗呼番子皆羶肉酪漿以充飢渴
山丹一種紅鹽色味俱佳北部以詣閭門易菽粟其鹽根色如丹堅
如石以之作器擬琥珀明指揮莊得歲採供御後以境外奏罷之

在山丹北口外五百里

李漁偶集載予爲秦客傳食於塞上諸侯一日脂車將發見炕上亂髮一捲謬謂婢子櫛髮所遺婢曰不然羣公所餉也詢知頭髮菜浸以滾水拌以薑醋其可口倍於藕絲鹿角攜歸餉客無不奇之謂珍錯中所未見此物產於河西得至江南亦千古一時之幸也

同治二年秋八月一道士披髮赤足巾繫柿子二枚於左右眼前手執棗梨歌於途曰棗梨棗梨柿在眼皮當時人多不解未幾回匪變作

同治初郭匪之亂賊至伶倫山見廟前柏樹叢翳欲斫以作薪斧斤伐之反自斫其足有強者不信又伐之仍斫其足賊大驚遂竄去至今惟伶倫山老柏最多

甘肅新通志

卷九十七

志餘 軼事

四十六

鞏昌府城西門外飲馬池大可數畝深不測同治閒突有蒲生池心圓徑寸許高五六尺葉寬如劍暢茂櫛比亭亭植水中根盤固結數千萬株密合成塊非歲晚冰結無從刈取蒲秀如蠟燭形故俗謂之毛蠟俟堅老用以療刃傷立愈光緒乙巳孟夏廿二日蒲叢忽自分裂一半由南移走池北仍挺立不仆越二日又微移七月初三日夜復移合一處廿一日申時颯颯有聲仍復移至池沿有頃又移距岸較前更近行人伸手可攀取一植物耳由合而分由分而合未久而復分不知是何祥也郡人貢生楊凌霄嘗著爲論以明鑒戒之意

秦州新志載罌粟花州屬舊有之千葉起樓色紅而豔民家園圃種以爲玩閒或鬻於市具絳紅白三色而單瓣者則未有也自道光末年始有種者至咸豐以後吸者日多種者亦日眾利厚工省又

不擇土之肥瘠故趨若鶩焉取液煮膏既諳其法遂自吸食而沿及妻孥久之廝丐亦然其傾家而致死者不可屈指數嗚呼天生毒卉禍生人乃至此與光緒二三年間總督禁種者惟州治奉行爲力其他率文具四年前巡道譚繼洵力振宿弊示所屬府州縣先禁冬種後禁春種又於二三月間飭各州縣官率鄉總歷行查禁並量給鄉總口食夏初結報其查禁不力者委員踏勘卽請參斥其年秋禁開煙館諭民種棉種桑以裕本業五年請獎查勘出力印委各員六年又張四字簡明告示五月親行查禁懲抗違者七年總督奏請重抽土煙釐金民以爲弗禁也復紛然起因請總督出示再行禁絕此數年中民頗畏法不敢偷種後法稍弛又復萌蘖然近歲蟲傷雨潦葩肥而汁稀羸利殊微意者天將除穢物貸斯民與

甘肅新通志

卷九十七

志餘 軼事

四十七

隴南舊有桑紫椹者葉大而薄白椹者葉小而厚然甚少婦女閒飼蠶得繭則翦花樣無所爲繅絲也帛則販自吳楚蜀豫絲則貿自閬利興元光緒四年巡道譚禁種罌粟思所以易之者州舊種棉解織布而不知蠶桑因於漢中購桑子在道署及州署隙地試種二年約得數萬株又在漢中歷年續購桑子數千斤桑秧十餘萬株分交各州縣諭民栽種七年出示收買民間生絲分上中下三等價銀自一兩八錢至一兩二錢繭亦分上中下價錢自三百至二百嗣募河南工匠繅絲及試織生絹及縐諭令人民學習後又購浙江桑秧蠶子僱江南人飼蠶繅絲又於州城四鄉租地栽種令民就近移植諭鄉紳經理前後凡四五年擘畫約束曲盡心力然樂成易慮始難民無知也在牧民者有以引而伸之耳

秦始皇二十六年有大人長五丈足履六尺凡十二人見于臨洮始

皇以爲瑞銷兵器作金人十二以象之重各千石置宮庭中
漢驃騎將軍去病出隴西過焉耆山得休屠王祭天金人顏師古曰
今佛像是其遺法也

瑞應圖天漢二年月支國貢神香凡三枚狀如燕卵大如囊時適大
疫使者請燒香一枚以辟疫氣病者皆起香聞百里積月不散
晉李石續博物志載弱水出流沙在西海郡北山有赤石白色以兩
石相打則水潤打之不已則潤盡火出山石皆燃炎起數丈不滅
有大黑風自流沙出奄之乃滅其石如初不敢輕近也
酉陽雜俎魏賈鏘有蒼頭善別水常令乘小艇於黃河中流以瓠匏
接河源水一日不過七八升經宿色如絳以釀酒名崑崙觴芳味
世閒所絕

續博物志藤杯出西域藤大如臂葉大似葛花如梧桐質堅可爲杯

甘肅新通志

卷九十七

志餘 軼事

四十八

以酌酒有文章映徹可愛實大如指味如豆蔻能消宿醒

異物志西域大秦國罽繡織成毼毼以羣獸五色毛雜之爲鳥獸人
物草木雲氣千奇萬怪上有鸚鵡遠望軒軒若飛其文赤白黑綠
紅絳金縹碧黃十種色古樂府請客上北堂坐毼及毼毼通俗文
毼毼細者謂之毼毼班超與弟固書月支毼毼大小相雜但細好
而已

史記注禹受黑玉書於洮水上

洮河綠石北方最重綠如藍潤如玉發墨不減端溪硯然石在臨洮
大河深水之底非人力所致得之爲無價之寶耆舊相傳雖知有
洮硯然目所未覩今或有綠石硯名爲洮者多是濼石之表或長
沙谷山石濼石潤而光不發墨堪作砥礪耳

開元遺事龜茲國進一枕色如瑪瑙溫潤如玉枕之則十洲三島四

海五湖盡在夢中因名爲遊仙枕

杜陽雜編唐順宗時西域進美玉二一圓一方徑各五寸光彩凝冷可鑑毛髮時伊祈元解方坐上前熟視之曰此龍虎玉也圓者龍也生於水中爲龍所寶若投之水必有虹霓出焉方者虎也生於巖谷爲虎所寶以虎毛拂之卽紫光迸逸而百獸懾伏詢使人果得之漁獵者

張掖西來寺傳有落星大如椀質如石色黯然紫以夜半落池中池水沸騰光搖戶牖久之乃寂寺僧寶藏之

黑河水有石色如玉剖之中有五色紋理或山水禽魚之狀柳谷水湧溢寶石負圖蓋卽此等

有自安西獻錢假面於帥府云得之士中長可五寸寬三之二兩目及鼻口皆具焉色如柿漆鍍銀爲白周圍小孔二十有六蓋以綴

甘肅新通志

卷九十七

志餘 軼事

四十九

於護頭者定爲漢唐時物卽蘭陵王之假面狄武襄之銅面具也明千戶李淳得古劍磨有異光出匣則鏗然有聲淳乃慷慨吟曰崑山一片鋼磨作倚天劍若得試一用太平立可驗

伏羲氏斲木爲琴綸絲爲絃二十有七而音樂自是興或曰神農爲五絃之琴桓譚以爲文王加少宮少商釋知匠以爲文王武王各加一絃是爲七絃

通歷云伏羲氏作二十五絃之瑟世本云庖羲瑟五十絃黃帝使素女鼓瑟哀不自勝乃破爲二十五絃呂氏春秋云朱襄氏使士達作五絃之瑟世紀云伏羲作瑟三十六絃蓋瑟屬陰故用十六之數

女媧氏命娵陵氏制都良之管又命聖女氏爲班管合日月星辰名曰充樂

黃帝命岐伯

北地人

作鐻鑄鼓角靈髀神鉦以揚德而建武又命伶倫

取竹嶰谿之谷

崑崙之北谷

斷兩節閒而吹之以爲黃鐘之宮

黃帝之時西王母獻昭華玉琯漢入關中得秦府庫所藏有笛長二尺二寸亦名昭華琯

黃帝作玉律以玉爲管長尺六孔爲十二音晉武帝時汲冢亦獲玉律尚書中候曰用玉爲律東漢以玉律十二候氣先王之法也以六十律候氣蓋京房之陋歟

古缶形如足盆或曰形如覆盆以四杖擊之昔秦趙會於澠池秦王爲趙王擊缶卽此是也唐永泰初司馬滔進廣平樂亦有八缶箏秦聲也按禮樂記箏五弦筑聲今并涼二州箏形如瑟不知誰所改易也李斯諫逐客書云夫擊甕叩缶彈箏搏髀而歌呼嗚嗚快耳者正秦之聲也楊惲書云家本秦也能爲秦聲魏文帝詩秦箏

甘肅新通志

卷九十七

志餘 軼事

五十

發新聲長笛吹清氣

漢武帝內傳西王母命侍女董雙成吹雲和之笙

漢武帝時南陽新野有暴利長遭刑屯田敦煌界數於渥洼水旁見羣野馬中有奇異者與凡馬來飲此水利長先作土人持勒鞞於水旁後馬玩習久之代土人持勒鞞得其馬獻之欲神異此馬云從水中出因作天馬之歌

太初四年貳師將軍廣利斬大宛王首獲汗血馬來獻大宛舊有天馬種蹋石汗血從前肩膊出如血號一日千里因作西極天馬之歌

漢有吹鞭之號筋之類也其狀大類鞭馬者今牧童多卷蘆葉吹之琵琶一名胡琴傅元琵琶賦序云世本不載作者故老云漢送烏孫公主嫁昆彌念其行道思哀使爲音者裁箏筑篴之聲作馬上

之樂以方語目之名曰琵琶取易傳於外國也釋名琵琶本出於胡中馬上所鼓也推手前曰琵琶引手卻曰琵琶象其鼓時因以爲名杜摯云琵琶興於秦末苦長城役百姓絃鞞鼓之唐明皇嘗悅之楊妃每奏於梨園諸王貴主並爲琵琶弟子文宗內庫有琵琶二號大小忽雷時有內弟子鄭中丞好彈小忽雷既而中丞沒爲梁師厚所得後遇良辰彈於花下有黃門過而聽之曰此鄭中丞琵琶聲也聞於文帝帝喜遣中使召之厚加錫賚

大橫吹小橫吹並以竹爲之笛之類也昔漢張騫入西域傳其法於西京得摩訶兜勒二曲李延年因之更造新聲二十八解以爲武樂後漢以給邊將晉魏以來二十八解不存其所用者惟黃鶴隴頭水出關入關出塞入塞折楊柳黃覃子赤之楊望行人十四曲唐樂所載大橫吹部有節鼓二十四曲小橫吹部有角笛簫笳

甘肅新通志

卷九十七

志餘 軼事

五十一

箎桃皮箎箎六種曲名失傳

北魏斛律金勅勒歌勅勒川陰山下天似穹廬蓋四野天蒼蒼野茫茫風吹草低見牛羊論者以爲天籟

隋開皇時初定令置七部樂一曰燕樂伎二曰清商伎三曰高麗伎四曰天竺伎五曰安國伎六曰龜茲伎七曰康國伎唐貞觀中增西涼疏勒高昌爲十部伎

唐禮樂志涼州曲本西涼所獻也其聲本宮調有大遍小遍貞元初樂工康崑崙寓其聲於琵琶奏於玉宸殿因號玉宸宮調

蔥嶺西曲唐禮樂志宣宗時有之士女踰歌爲隊其詞言蔥嶺之民樂河湟故地歸唐也

金臨洮人鄧千江詩爲金朝第一今傳其獻張六太尉望海潮一首陶九成所謂近世之大曲也其詞曰雲雷天塹金湯地險名藩自

古皋蘭營屯繡錯山形米聚襟喉百二秦關鏖戰血猶殷見陳雲
冷落時有鷗盤靜塞樓頭曉月依舊角弓彎 看看定遠西還有
元戎闡令上將齋壇區脫晝空兜鈴夕解甘泉又報平安吹笛虎
牙閒且宴陪珠履歌按雲鬢招取英靈毅魄長繞賀蘭山

西河竹枝詞載有元時燕不花字孟初張掖人詩一首湖頭水滿藕
花香夜深何處有鳴榔郎來打魚三更裏凌亂波光與月光

明狄道九華觀相傳明張赤腳脫化處有石刻詩云薰風勃襟懷我
靜良其背稽首九華仙焚香候芝蓋又築關時土中得二詩云價
重篇篇玉聲傳字字金山爲我助無日不高吟 一夕玉皇詔
爲君功行成分明五雲裏拔宅上三清不載名氏

狄道慈陰寺有石笋一株上鐫詩云何年古樹倒化作琅玕玉神工
解天倪遠致出窮谷園亭春晝長相娛饒卉木娉娉立瘦姿日暮

甘肅新通志

卷九十七

志餘 軼事

五十二

倚修竹空翠帶晴嵐秀色真可掬會有賞心人忘言對幽獨末書
東隳二字其陰鐫來風亭清玩五字隳古麓字蓋明太常卿何賢
作也

段容思成進士後差纂山西志明年志成移疾歸讀書於五泉小圃
依巖作洞有得卽形於詩有云風清雲淨雨初晴南畝東阡策杖
行幽鳥似知行樂意綠楊煙外兩三聲論者謂宛然有浴沂氣象
性孝友最篤分義友人唐廷器貧甚其沒也爲具棺殮布政使石
執中曾孫以貧鬻於人爲捐貲贖還業師周麟沒撫其後每至其
家坐必避席仕宦雖未居言路而屢有建白如請修龍逢比干祠
墓請從祀元儒劉因請旌孝行節義開言路諸封事皆有闢國體

風化

明周憲王有燉勤學好古製誠齋樂府傳奇若干種音律諧美李夢

陽汴中元宵絕句云中山孺子倚新妝趙女燕姬總擅場齊唱憲
王新樂府金梁橋外月如霜時在慶陽所作也

徐迪功少學六朝所著五集類靡靡之音及見李北地初猶崛強賦
詩云我雖甘爲李左車身未交鋒心未服顧予多見不知量此項
未肯下頗牧旣而心傾意寫營壘旌旗忽焉一變是時李何並陳
未決雌雄迪功精銳無多能以偏師取勝遂成鼎足按楨卿字昌
穀一字昌國吳縣人仕迪功郎

張兌溪出都鄉人牟僧以一箱託寄牟道卒兌溪至里召牟族及寶
塔寺僧眾焚香啟箱則白金三百兩袈裟數領兌溪爲營其葬事
餘悉散於牟族眾皆驚歎斛山楊爵以直諫長繫出獄時搢紳餽
問一切謝卻兌溪具一茗禮斛山喜曰此吾同志人也受之赴廬
州時楊椒山贈詩云我期元素回天力何事赤符此日行幾度爲

甘肅新通志

卷九十七

志餘 軼事

五十三

親焚諫草百僚忌爾著時名鶯啼秦樹晴煙暮旌拂廬雲曙色明
若遇超然同志問爲言終不負平生

國朝王士禎七言凡例何李學杜厭諸家之坦易獨于沈鬱頓挫處用
意論詩絕句云中州何李並登壇宏治文流競比肩詎識蘇門高
吏部嘯臺鸞鳳獨迺然文章煙月語原卑一見空同迴自奇天馬
行空脫羈勒更憐談藝是吾師

威信公岳鍾琪字東美號容齋先世湯陰人宋忠武王飛二十一世
孫十七世遷蘭州祖鎮邦字定寰移居臨洮官至大同鎮總兵加
左都督父昇龍字見之官至四川提督謚肅敏 予騎都尉世職
寄籍成都子四鍾琪其仲也官至川陝總督加太子太保進爵一
等威信公著有蛩吟薑園復榮等集每於軍旅之間輒寄嘯於筆
墨邊塞諸作多慷慨悲歌之氣而退居林下寄情花鳥又復神似

放翁石湖諸君所謂奇人真無所不可初鍾琪出征青海十八部落皆封王爵自二月八日出師至十六日悉皆擒斬蕩平故述懷三十韻有云出師不十日生擒十八王蓋實語也

袁 枚云岳大將軍鍾琪一代名將容狀奇偉食飲兼人而工於吟詩丙辰赦歸後種菜於成都之百花洲尹文端公贈詩云他日玉書傳詔日江天何處覓漁翁未幾王師征金川果復起用過邯鄲題壁云只因未了塵寰事又作封侯夢一場岳公喜題壁周蘭坡學士祭告西岳所過僧壁山岩見題詩甚佳字亦奇古款落容齋不知卽岳公也

金川之役鍾琪嘗有詩自序云余閒居十二年童頭豁齒景逼桑榆因大金川土酋狂悖致干 天討自乾隆十二年五月進兵至十三年五月尙未克捷余奉 旨統師黨壩又 命大學士公納親

甘肅新通志

卷九十七

志餘 軼事

五十四

經略軍務督師剿逆自立秋以來靈雨連旬阻我長驅有感而作云遯跡邱林十二年於今又著祖生鞭銅標未建將軍柱錦纜重牽相國船瀘水瘴來雲似墨蠻荒秋後雨如泉靈淋欲試蒼蒼意先挽天河洗穢羶

岳鍾琪妻高氏封爲一品夫人能嫺弓馬鍾琪出征署中內外莫不肅然能詩與鍾琪唱和歿後鍾琪哭以詩云一字如金愛惜之卻因相敬故如斯從今永擱閨中筆自此無人解和詩

巫雲姓韓華陽人岳鍾琪侍兒善歌舞最獲寵愛後以微嫌遣之去鍾琪送以詩云漫化巫山入夢雲向人重著海榴裙年來杜牧風流減襍被無香夜不薰相傳巫雲有詠鈴兒草詩云眾芳燦爛獨青青賺得明皇仔細聽寄語流鶯今且去春風繫遍護花鈴一云鍾琪代作

關南許天玉瑛由安定令罷官嘗僑寓狄道娶一老嫗王士禎詩許生潦倒作秦贅是也狄道舉人吳鎮曾於一舊家處鈔得其遺詩八卷皆士禎感舊集中所未載者因題以三絕云閩海詩人許鐵堂雙松一曲妙漁洋卻憐白首關山月桃隴梅溪入夢長蠶頭小楷擬瓊瑤破楮煙侵已半消讀罷臨風三歎息如君猶自老漁樵丁卯風流化冷煙老爲秦贅亦堪憐當時誰作鶯花主不與東山買墓田鐵堂墓今在安定東門外士民歲時祭之

狄道張牧公初至其兄丹徒縣署以能詩聞江南人以其年少未之許也會春日諸名士邀飲板橋請爲詩牧公卽口占二絕云晴煙遠接瓜洲渡細雨低迷揚子橋薄暮孤舟下春水鐘聲閒落大江潮板橋東去是清溪無數春鶯坐樹啼欲聽江南楊柳曲美人遙在杏花西眾乃服牧公有寄白石圃訊南郊舊居詩云南郊棲

甘肅新通志

卷九十七

志餘 軼事

五十五

息地百畝帶荒園亂後知誰主天邊愧我存雜花多傍舍高柳定成村君每騎驢過何人爲應門辭意真古居然陶杜又孫豹人贈別牧公詩云作客相寬賴酒卮把君詩句淚交頤廣陵閒續蕪城賦春日苦吟棠棣詩拔劍出門年正少馱書歸里馬難騎何時攜手蓮花嶽高詠還看謝眺奇亦可想見其境遇氣概

狄道趙援由增生充內閣供事授上海縣巡檢嘗有句云柳鎖鶯魂煙萬井花翻蝶夢鼓三更人謂其淒豔欲絕後以補官沒於山西泰安驛旅櫬蕭然竟成詩讖同時有武生樊必遴老而好吟嘗遊蓮花山有鐘聲風上下塔影月東西之句人多稱之

張守曾狄道瞽者也通詩法著有蘭芳草如漏催心曲裏春到淚痕邊歸雲連雁影落葉帶蟬聲杵冷山村月鐘沈野寺煙等句皆清婉可誦使斯人而生於東南則唐仲言之流亞矣

馬紹融狄道櫛工也酷耽吟詠其詩如江上楓疏人欲散籬邊菊冷
雁將歸嵇琴待月橫牀冷江管飛花落硯香皆有風致

謝天錦字漢襄蘭州人僑居廣陵嘗遊京師與三原孫豹人狄道張
康侯兄弟友善其後不知旋里與否蘭人無知之者貢生楊元勳
偶於市上見其燕遊近草一帙首載孫豹人一序始知其爲此地
人亟購以歸其詩雅鍊雄俊不落凡近如渡黃河云日落長河渡
天風下大荒彤雲連斷岸野火出枯桑浪播古今怒沙飛天地黃
乘時惟在德設險說金湯夜發郟城迷道云五夜行來郟子國驅
車南北欲何憑天連奎宿分東魯地迴黃河入廣陵風氣遠從江
上變日光平向海門生征鞭猶在荆榛內古木牽衣落野藤風格
俱力追少陵他如鴻雁不來江國信茱萸遙接隴雲愁九日集鄭中翰齋中

別話 山山來暮笛寺寺老霜楓晚渡 秦蕪滿縣惟衙署風雨窮簷半

甘肅新通志

卷九十七

志餘 軼事

五十六

老翁蒙陰縣 蒼煙封鳥道曲水隔人家汀花嶺 碑斷六朝存古篆花飛

三月換新詩洛陽懷古 飛鳥拖雲氣朝煙罩酒旗鞏縣道中 等句皆清新可

誦乃似續無聞鄉里之間至不能舉其姓字古今才人之湮沒者
可勝道哉

袁 枚隨園詩話近日十三省詩人佳句余多採錄詩話中惟甘肅
一省路遠朋稀無從搜輯戊申春忽江甯典史王柏厓光晟見訪
貽五律四首一氣呵成中無雜句余灑然異之問所由來云幼講
詩於吳信辰太守吳詩奇警詠蠟梅云陽春如開關盤古卽梅花
牡丹僭稱王富貴何足誇羣芳愬天帝鵝雁紛喧譁乃呼羅浮仙
冒雪詣殿衙帝曰咨爾梅首出冠羣葩白袷與絳襦何以懲奇衰
梅花未及對黃袍已身加歸來幽夢寒翠羽鳴窗紗榆錢曲云桃
花笑老榆汝是搖錢樹不解濟王孫飛來復飛去午夢云竹逕涼

鷓入芸窗午夢遲偶然高枕處便是到家時木蘭女云絕塞春深
草不青女郎經久戍龍庭軍中萬馬如搗鼓只作當窗促織聽或
病其存詩太多乃答云詩自心源出妍媸惑愛憎譬如不才子搗
殺竟誰能或惜其存詩太少又答云詩似朱門客誰甘草具餐三
千隨趙勝選俊一毛難吳別號松崖甘肅狄道州人

唐高駢節度西川又調廣陵詠風箏云依稀似曲才堪聽又被風移
別調中吳官山左又調楚江詠懷云阿婆經歲撫嬰孩飢飽寒暄
總費猜才得呱呱真痛癢家人又報乳娘來兩意相同余雅不喜
陳元禮逼死楊妃過馬嵬云將軍手把黃金鉞不管三軍管六宮
吳過馬嵬云桓桓枉說陳元禮一矢何曾向祿山亦兩意相同吳
又有韓城行云良人遠賈妾心哀秋月春花眼倦開忍死待郎三
十載歸鞍馱得小妻來詠虞美人花云怨粉愁香繞砌多大風一

甘肅新通志

卷九十七

志餘 軼事

五十七

起奈卿何烏江夜雨天涯冷休向花前唱楚歌

同上

三原劉紹放謂

國朝西州騷壇執牛耳者二人其一洮陽吳信辰鎮其一秦安胡靜菴
鉞或以雋雅勝或以樸老勝二人之詩久有定評此外以詩名家
者不下數十百人然當世說詩者率不之及豈地在荒遠輶軒之
采有所或遺抑士大夫敦尚樸學恥相標榜以弋名譽則風俗之
厚也卽此可以言詩矣夫車鄰駟鐵古稱夏聲苟繼其聲而張之
黜淫哇陶情性烏在不能含宮嚼徵鳴當代之盛也五言始於河
梁送別李陵實成紀人而河西自古以詩名者惟陰鏗爲著史稱
其五言詩與何遜同工杜甫嘗謂李白佳句往往似鏗鏗詩見重
於世如此唐宋元明姑置勿論卽如

國朝劉漢良統張鳳颺翮皆武威人亦皆以詩鳴統乾隆辛酉拔貢官

直隸任邱知縣有光復堂集爲詩雋上七言尤多傑作深秋晚眺
云疏星幾點接殘暉檻外無端失翠微遠樹鴉翻連露宿長空鶴
唳帶秋歸煙含暮野雲方斷雨過荒原草不肥鬻粟數聲人去後
平臺楓葉亂飛飛題湯陰岳鄂王祠撼山撼岳是誰雄談笑東窗
怯女戎汴水寒心徒遠望燕雲睡手竟成空金牌鐵馬三軍外白
羽黃龍一夢中二十四陵殘夜月中原灑淚哭西風其他警句五
言如邠州道中古穴雲穿徑高城鳥颺空潼關曉渡櫓外波聲壯
河干樹影重長門怨明月向誰照素琴空自張過六盤山澗水飛
春瀑山花綴曉隄六盤山遇雨風聲敲石骨瀑影落春泥登空同
藥苗山鬼護靈餌野猿通望華山諸山疑伏地一掌獨擎天卓然
可誦翻乾隆己丑進士戶部郎中後官長沙知府有念初堂集爲
詩力追盛唐五言尤工沈摯於子美爲近晚次東樂云蒼莽居延

甘肅新通志

卷九十七

志餘 軼事

五十八

道邊陰起暮愁戍荒沙委角烽斷燒當樓近郭居人少緣溪落葉
稠叩關聊假憩蕭瑟不堪留歸省道經商山作白雲懸望眼歸馬
不知勞人去楚山遠路隨秦樹高風泉喧旅枕煙草膩征袍安得
紫芝採登堂奉壽醪歸家見諸姊妹不復相識爲之愴然姊妹向
來少鬢毛今復斑如何見夢寐不是此容顏拭淚話殘燭銜哀歸
故山百身我莫贖偷息尙人間將赴楚留別諸兄弟原上脊令在
天涯鴻雁飛艱難賴兄弟遲暮遠庭闈波浪三湘惡風霜九月威
旅愁將別淚嗚咽不能揮由黑龍口度秦嶺谷口一徑入煙嵐深
幾層暗泉橫臥柳崩石倒垂藤塵事了何日幽樓卜未曾空勞雲
壑裏瘦馬踏凌兢暮抵渭河遇雨就宿草店客行無早暮野宿飽
經過古店深明火荒原背枕河雨聲愁裏盡山色夢中多莫數心
頭事燈前髮已皤送友人從幕伊犁倚劍氣縱橫酒酣長揖行秋

風起別袂客思入邊城白草連天合黃沙漫海平誰堪從此別匹
馬八千程懷吳芳圃一夜疑風雨階前落葉稠美人隔遙水孤月
冷扁舟客路難爲別天涯畏及秋多情勞顧問尺素尚沈浮送李
聖聞赴右玉客意正無賴那堪君遠行青門一尊酒揮手亂山橫
殘月沙邊戍秋風角外城由來蕭瑟地羈旅動關情密雲道上野
曠延行客秋深欲暮天馬蹄亂斜日鳥語入孤煙一水寒沙外數
家殘葉邊故山歸未得放眼見秦川舟下峽江城勢緣岡折江聲
抱郭流寒煙深蜀口孤艇下巴邱落木當風迴殘虹帶雨收碧螺
峰咫尺回首不勝愁送友人入蜀嵐氣日陰陰巖巖有路尋行旌
懸鳥道客淚墮猿吟白浪蠻煙合青楓峽雨深禹功疏鑿在到處
一登臨黃鶴樓望漢江風急浪初驕蒼茫漢水遙煙昏三峽雨氣
壓九江潮岸草迷吳壘漁歌入楚謠何人更吹笛倚檻首頻搔彝

甘肅新通志

卷九十七

志餘 軼事

五十九

陵芳草靈均宅春風爾雅臺古今誰著作臨眺此徘徊水奪荆門
出山紆葛道迴依然鍾秀地寥落昔人才過鑽天坡晚宿荒戍青
霄忽有路直上際天垠牽挽隨羣力艱危試一身野猿時叩馬山
鬼夜窺人明日愁看鏡重添白髮新登黃鶴樓久宦歸無計中年
老漸愁那堪當落日獨自倚危樓雲識三湘雨風悲萬里秋江湖
橫滿地祇覺此生浮朱仙鎮謁岳廟長城誰汝壞河北竟無收遺
廟松風響中原汴水流天寒雲自陣壘斷草常秋痛絕班師日旌
旗挽不留巫山峽白浪號空下蒼山拔地分蛟龍蟠石窟虎豹穴
江濱峽靜風常響天低日易曛何關神女事暮雨與朝雲灩澦堆
誰鑿瞿塘峽天成灩澦堆重江爭道入孤柱挽瀾迴畫舸中流下
清猿盡日哀依人念子美愁絕此閒來其他警句五言如登嘉峪
關白日沈沙遠黃雲蓋樹低行經終南亂藤爭刺眼危石猛當頭

通州舟中遠水銜天盡孤雲抱月飛秋雨無聊憶兒輩正在鄉試
寓目成詠蝸牛盤壁固雅虎下亭驕見江上漁者有感江湖隨地
闊風月與君閒送陳別駕之歸州雨深牽纜重風滿落帆遲過荆
門州斜風山向背當路水縱橫夜宿山村草響蛇尋穴風腥虎過
門黃牛峽山影沈灘碎猿聲抱月幽李振聲席上話舊別來吾亦
老官在爾猶貧八陣圖江山存鼓角風雨寄兵符杜甫草堂亂來
無故國老去有扁舟過忠州人煙高眾木江色豁諸峰晚泊一水
界村白亂山當岸青七言如西陵寄興倒峽波搖狼尾動鑱天石
錯虎牙來行次巴東水抱雲根爭虎渡天垂雨腳下龍堆春日步
九宮山萬里晴沙歸雁早大隄春雨落花多過淮陰侯祠風雲橫
埽重瞳子恩怨偏歸兩婦人皆可誦也

金城允吾之界有曠野焉周圍約八百里其名曰秦王川川名不考

甘肅新通志

卷九十七

志餘 軼事

六十

或曰辭舉竊據時所名也或曰秦王平仁杲後遺兵略地至此故
名之川有洞砮然窪然內產石青居人呼爲石青洞川敞洞幽時
形靈怪每清曉輒見城郭樓臺人馬旌旗之狀如海市然土著者
不以爲異也

按靖遠衛志載衛東九十里
渦兒川北青崖亦有此景

蘭州黃河沿晏公廟宗將軍不知何神俗傳金時黑白二龍鬪於蘭
州河波濤汹涌勢將入城將軍奮怒跨馬持利刃馳斬黑龍水驟
平而將軍亦歿說近荒唐似不可信然古之豪傑亦有入水斬蛟
者有與水神戰鬪者金之諸宗列於史者數十人將軍或豪傑之
士而史失載矣

水經注洮東峪水名曰濫馬援曾引水教民種稻予嘗題伏波將軍
石碣云洮陽守郡時濫水教民稻如今高岸遷東峪流灑灑

順治七年蘭州回賊反浮橋被焚總督孟喬芳剿之敗死於河者無

算橋尋修成夜有羣鬼從河中出援纜上橋守兵射之不能退鎖
轟然中斷橋乘流而下鎖有飛十餘里者追二十里止於河中灘
旋拽還故處鬼爭如前芳以河燈五千盞祭之乃止

黃河冰結時可通車馬其狀如積雪填於巨壑嶙峋參差不復知有
河形信奇觀也皋蘭縣志載有陳繩祖冰橋行云嶙峋冰柱崑崙

尻神鷗坐嘯仙狼嘯

西域人云彼處有冰山山有冰柱長數十丈圍數丈山神爲二老鷗大雪迷路輒有仙狼

引道循其跡而行

星源滄渤勢難遏浮凌直下金天高金天高高風凜冽

竹箭奔騰有時結崦嵫落日炫迴光燭龍夭矯銀潢裂貝闕珠宮
徹夜明捲起千堆萬堆雪皋蘭河橋天下無中原珠玉走名都橫
開鐵鎖聯檣碇直跨金城散雁鳧霜嚴十月寒威動漸蹶明瀾如
練永乍似浮漚萬點飄泛玉溶銀已無空尋行抵隙劃方舟如劍
如戈下急流震蕩魚龍然夜火低迷旌旆駭鳴騶輪蹄得得無時

甘肅新通志

卷九十七

志餘 軼事

六十一

已鮫人暗泣馮夷起忽訝如山水底橫撒揆臙腫糜碎矣砉然一
聲諸綆斷河東連舫東西散大峽陰森積氣寒澤腹初堅流轉緩
鱗鱗直次水車園萬派無聲息夜喧但有雪峰填亂壑更無波瀾
與飛翻老狐未聽行人渡蟻穿九曲明珠路佶屈崎嶇蹇步難車
馬雲屯愁去住傳聞漲水復漫漫此水何來漲轉寬盡平蹊谷安
如砥世上何曾行路難冰橋自昔聞天造朝來驚喜家童告應候
年年不易方循名核實非虛冒蒼茫此意想神靈報德無辭白馬
刑之看二月桃花水冰泮河橋柳色新

青海每歲長至前數日水無纖冰一夕聞轟轟大礮聲作自海中震
天動地詰朝視之滿海凝冰如萬頃琉璃迨至立夏前數日轟響
如前一宵凍解水光澄碧曾無點漸其節氣之驗如此

星宿海形如葫蘆腹東口西東南匯水汪洋西北亂泉星列合爲一

體狀如石榴迸子每月既望之夕天開雲淨月上東山光浮水面就岸視之大海汪洋湧出一輪水鏡億萬千百明泉掩映又似大珠小珠落玉盤也少焉風起波面銀絲散渙素練分裂眩目駭心眞塞外奇觀也

成縣民鬪氣輕生婦女尤甚每以口角細故輒自縊投河縣令黃泳卜告城隍點天燈於城南北隅由是相驗之役減某歲燈杆偶爲風折令以疾未卽更豎旬日內報自盡者四因卽爲重立繼照乃安息如故

成縣城北十里利澤龍神廟前有池狀如置壺廣踰尋丈深不可測四時不溢不竭靈蛇出沒有毛有角當嬴秦時嘗以禮幣投詛楚文於中而神爲之効自是禱雨輒應湫腰有竇下瀝爲井居民用汲或澣濯於此雍正七年秋月望夜四畔居民忽聞水聲鼎沸如

甘肅新通志

卷九十七

志餘 軼事

六十一

雷鳴吼迨明起視湫已枯竭有識者相與諏曰取他水淨池復延高功設醮嗥懺悔過謝罪七口水來復

朝那湫在崆峒西南七十里湫頭山渟泓五畝秦以名縣秦方圖楚爲文以詛楚曰敢昭告於巫咸大神以底楚王熊相之多辜顏師古曰在安定郡清澈不容穢濁每喧填輒興雲雨土俗亢旱於此禱之故天下之湫以此得名史記封禪書湫淵祠朝那是矣惟詛楚事成縣利澤池亦有此說未審孰確又固原東西海子亦名朝那湫父老相傳最初止有東海子厥後有婦人以穢物就浴附近居民夜夢龍神借牛馬搬家次夜聞波濤汹涌如萬馬千軍之聲向西去及曉凡人家牛馬汗流浹體皆困臥趨視東海子則已涸而西山中忽有水澄泓數畝深不測卽西海子是也此與利澤池中涸後復事略同至靈臺鎮原等縣之湫今皆以朝那名則眞附

會不實矣

隴右名山仇池最著相傳絕頂廟下有洞深入三重俱經泉中以蹠足入以燭火行洞入二重左右列石其形如人自是以往寒苦淵深不可復入取水救旱守之須謹有不謹者水卽遁去大眾追尋動以數里水結爲冰而挂樹間稽首致禮水復於壺還著壇壝甘霖以沛杜詩萬古仇池穴潛通小有天蓋謂是云

安定縣沈兒谷口有澗水每歲冬至後十餘日若水泉發動潢流滿澗者來年必秋成大有農人常準此以驗一歲之豐歉

敦煌月牙泉廣數十步周圍皆流沙灣環如月形清澈見底按漢渥洼泉卽今月牙泉後世因其形似故訛渥洼之音爲月牙顏師古曰洼於佳反蘇林音窰曲之窰索隱曰音烏花反朱鳳翔月牙泉詩德水源傳星宿海靈池勝紀月牙泉不形卮洩疑無地倘有槎

甘肅新通志

卷九十七

志餘 軼事

六十二

尋定到天沙嶺迴風森壁立鐵魚跋浪蹴渦旋憑誰問取龍媒跡
漢武當年正拓邊

鳴沙山亦在敦煌山綿亙數十里皆沙雖天晴不風而沙常鳴其聲徹遠朱堃鳴沙山歌鳴沙之山何崔嵬壁立萬古無傾頽衝寒疾風吹不起百夫蹙踏激盪鳴輕雷拋衣奮臂各成隊尻竦足撐下如墜初聞殷殷繼咚咚餘音似與宮商配或言此地肺中空乃作響遮莫八柱穴元氣時下上一竅偶閉聲隆隆正如雙耳被人蒙是誰好事爲此劇嘲笑不怕惱天公沙本不解鳴沙鳴人所使遊嬉值昇平感慨念厥始敦煌古郡幾回開鼙鼓驚天動地來今日沙場圍繡壤依稀琴筑費人猜

後周書鄯善西北有流沙數百里夏日有熱風爲行旅之患風之將至惟老駝知之卽鳴而聚立埋其口鼻於沙中人每以爲候亦即

壅蔽口鼻其風迅駛斯須過盡若不防者必致危殆顏師古曰流沙在敦煌西八十里今日熱風之患已息閒有野駝出沒其中見人避亦無所傷

雷音寺卽千佛洞在敦煌城南四十里不知建自何時有斷碑云唐代重修疏岩鑿石佛龕層疊無算其像有裝塑者有繪畫者以數萬計廟貌甚麗明時回人蹂躪佛像屢遭毀壞龕亦爲沙所掩而畫壁丹青尙有存者令道人等梳爬略見眉目四月八日戶民爲浴佛之會香火稱盛

三危山據沙州衛志在敦煌城東南三十里今按山在千佛洞之東由新敦道上轉望東南有三峰聳峙視前後山最高山上有亭舊志稱四時積雪不消近來天氣溫暖惟冬閒有之文人嘗憑眺焉玉關陽關俱在沙州境內雖舊址無存懷古者猶深憑弔按舊志玉

甘肅新通志

卷九十七

志餘 軼事

六十四

門關在龍勒縣界敦煌西北百餘里陽關在壽昌縣西六里居玉門關之南壽昌卽龍勒縣地今巴彥布喇之西有壽昌縣城牆數堵猶存蘇履吉兩關遺蹟詩西界陽關與玉門于闐古道蹟猶存曾看定遠成功返已遣匈奴絕塞奔此日歌傳三疊曲當年地紀萬軍屯一方雄控今何若幾度春風許等論

